

AN A

**TIMP DI
AVENT**

I DOMENIE DI AVENT

PRIME LETURE

Il Signôr al da dongje ducj i popui inte pâs eterne dal so ream.

Dal libri dal profete Isaie

2,1-5

Vision ch' al à vude Isaie, fi di Amos, sun Gjude e sun Gjerusalem.

Al sucedarà che tai temps a vignî

la mont de cjase dal Signôr

e sarà stabilide su la spice des monts

e si alçarà sù parsore dai cuei.

Ducj i forescj a coraran di jê,
e a vignaran un grum di popui disint:

«Vignît, anìn su la mont dal Signôr,

tal templi dal Diu di Jacop,

par che nus insegni lis sôs stradis

e ch'o podin lâ indenant pai siei trois».

Parcè che di Sion e vignarà fûr la leç

e di Gjerusalem la peraule dal Signôr.

Lui al sarà judiç tra i forescj
e al decidarà di une vore di popui.

A mudaran lis lôr spadis in sapis

e lis lôr lancis in falcets;

une gjernazie no alçarà la spade cuintri di un' altre

e no praticaran plui la vuere.

Cjase di Jacop, vignît,
anìn indenant te lûs dal Signôr!

Peraule di Diu.

SALM RESPONSORIÂL

Dal Salm 121

R. Anìn contents incuintri al Signôr.

Ce ligrie cuant che mi an dite:

«O larìn te cjase dal Signôr».

I nestris pîts bielzà si cjatin,

Gjerusalem, dentri des tôs puartis! **R.**

Lassù lis tribûs a levin,

lis tribûs dal Signôr,

seont la leç che Israel al à vude

di laudâ lassù il non dal Signôr.

Lassù a son prontadis lis sentis de justizie,

lis sentis de cjase di David. **R.**

Bramait la pâs a Gjerusalem:

chei che ti vuelin ben ch'a vedin furtune!

Ch'e sedi pâs jenfri des tôs muris,

jenfri dai tiei palaçs bondance. **R.**

Par amôr dai miei amîs e dai miei fradis
o disarai: «Che pâs ti compagni!».
Par amôr de cjase dal Signôr, nestri Diu,
o domandarai: «Che il ben tu gjoldis!». **R.**

SECONDE LETURE

La nestre salvece e je dongje.

De letare di san Pauli apuestul ai Romans
13,11-14

Fradis, al è za rivât par vualtris il temp di dismovisi de sium; di fat cumò la nestre salvece e je plui dongje di cuant che o vin dit di sì a la fede.

La gnot e je indenant, il dì al è daûr a cricâ. Alore butìn di bande lis oparis dal scûr e vistìnsi des armis de lûs.

Compuartìnsi cu la dignitât ch'al à di vê chel che al opere in plen dì: no cun baldoriis e cun cjochis, no cun sporcjetâts e cun robatis, no cun barufis e cun gjelosiis. Vistîtsi invezit dal Signôr Gjesù Crist e no stait a lâ daûr de cjar cu lis sôs bramis disordenadis.

Peraule di Diu.

CJANT AL VANZELI

Sal 84,8

R. Aleluia, aleluia.

Mostrinus, Signôr, la tô misericordie,
e danus la tô salvece.

R. Aleluia.

VANZELI

Veglait, par jessi pronts cuant che al vignarà.

Dal vanzeli seont Matieu

24,37-44

In chê volte, Gjesù al disè ai siei dissepui: «Come ch'al è sucedût tal temp di Noè, cussì e sarà la vignude dal Fi dal om. Di fat, come che tai dîs prin dal diluvi la int e mangjave, e beveve, si sposave e si maridave, fint a la dì che Noè al jentrà ta l'arcje, e no volerin crodi fin che nol plombà jù il diluvi e ju netà vie ducj, propit cussì al sarà a la vignude dal Fi dal om. In chê volte, se a saran in doi te campagne, un al sarà gafât e chel altri lassât stâ; se dôs feminis a saran daûr a masanâ cu la muele, une e sarà gafade e chê altre lassade stâ.

Veglait duncje, parcè che no savês in ce dì ch'al ven il vuestri Signôr. Tignît a ments chest: se il paron di cjase al savès in ce ore de gnot ch'al ven il lari, al veglarès e no si lassarès fiscâ la cjase. Par chel ancje vualtris tignîtsi pronts, parcè che te ore che no crodês al ven il Fi dal om».

Peraule dal Signôr.

II DOMENIE DI AVENT

PRIME LETURE

Al judicarà i puars cun justizie.

Dal libri dal profete Isaie

11,1-10

In chê dì, un sfiol al saltarà fûr dal tronc di Jesse
e une menade e vignarà fûr des sôs lidrîs.
Sore di lui si poiarà il spirit dal Signôr,

spirit di sapience e di inteligence,
spirit di consei e di coragjo,
spirit di cognossince e di timôr dal Signôr.

Al cjatarà la sô contentece tal timôr dal Signôr.
Nol judicarà seont lis aparincis
e nancje nol fasarà sentence par sintût a dî;
ma al judicarà i misars cun justizie
e al cjaparà decisions justis pai puars de tiere;
al pacarà il prepotent cu la vuiscje de sô bocje
e al fasarà murî il trist cu la soflade dai siei lavris.
La justizie e sarà la fasse dai siei ombui
e la fedeltât la cengle dai siei flancs.

Il lôf al vivarà insieme cul agnel
e la pantere si distirarà insieme cul cjavret;
il vidiel e il leon a passonaran insieme,
un frutut piçul ju menarà.
La vacje e l'ors a passonaran,
i lôr piçui si distiraran insieme,
il leon al mangjâr stranc a usance il bo.
Il frutut di tete al matearà su la buse dal sarpint
e il canai al metarà la man te cove de lipare.
No si fasarà mât ni dam di sorte
sun dute la mê sante mont,
parcè che la tiere e sarà incolme
de cognossince dal Signôr,
come che lis aghis a cuvierzin il mât.

In chê dì al sucedarà
che la lidrîs di Jesse
si alçarà sù tant che bandiere pai popui;
i forescj a coraran viers di jê,
e la sô cjase e sarà plene di glorie.

Peraule di Diu.

SALM RESPONSORIÂL

Dal Salm 71

R. Ven, Signôr, re di justizie e di pâs.

Diu, dai al re i tiei ordins,
al fi dal re la tô justizie.
Ch'al rezi il to popul cun justizie,
cun onestât i tiei puars. R.

Ch'e florissi tai siei dîs la justizie
e pâs in bondance,
fintremai che no si distudarà la lune.
Che si slargji il so ream di un mât a di chel altri,
dal flum fint ai confins de tiere. R.

Lui al liberarà il puar ch'al clame jutori,
il biât che nol à nissun che lu jude.
Al varà remission dal debul e dal puar
e al puartarà a salvament la vite dai biâts. R.

Ch'al duri il so non par simpri,

il so non ch' al duri denant dal soreli.
Ch'a sedin benedidis midiant di lui
dutis lis gjernaziis de tiere,
che lu disi furtunât dute la int foreste. **R.**

SECONDE LETURE

Gjesù Crist al salve ducj i oms.

De letare di san Pauli apuestul ai Romans

15,4-9

Fradis, dut ce ch' al è stât scrit prime, al è stât scrit par istruînus nô, di mût che cu la pazience e cu la consolazion che nus vegnin de Scriture o podìn vê la sperance.

Il Diu de pazience e de consolazion us dedi di volê, tai vuestris rapuarts fra di vualtris, lis stessis robis sul esempi di Gjesù Crist, di mût che cuntun cûr sôl e cuntune bocje sole o glorificais Diu, Pari dal nestri Signôr Gjesù Crist.

Par chel acetaitsi in amicizie un cul altri, come che ancje Crist nus à acetâts nô a glorie di Diu. O vuei dî che Crist al è deventât servidôr dai circuncidûts par mostrâ che Diu al è di peraule e al à colmadis lis promessis fatis ai paris; i paians invezit a glorifichin Diu pal so boncûr, come ch' al è scrit: "Par chest ti laudarai framieç dai popui, o laudarai il to non cu la cjante".

Peraule di Diu.

CJANT AL VANZELI

Lc 3, 4.6

R. Aleluia, aleluia.

Prontait la strade pal Signôr; splanait i siei trois!

Ogni om al viodarà la salvece di Diu.

R. Aleluia.

VANZELI

Convertîtsi: il ream dai cîi al è dongje!

Dal vanzeli seont Matieu

3, 1-12

In chei dîs al capitâ Zuan il Batiste a predicjâ tal desert de Gjudee, disint: «Convertîtsi, parcè che al è dongje il ream dai cîi!».

Di lui al fevele il profete Isaie, là ch' al dîs: "Vôs di un ch' al berle tal desert: prontait la strade dal Signôr, dreçait i siei trois!".

Zuan al jere vistût cuntune vieste di pêi di camêl, peade tor dai ombui cuntune cinturie di piel; il so mangjâ a jerin zupets e mîl salvadie. A rivavin di lui int di Gjerusalem, di dute la Gjudee e di dute la region ad ôr dal Gjordan, e si fasevin batiâ di lui tal flum Gjordan, confessant i lôr pecjâts.

Viodint a capitâ une vore di fariseos e di saduceos par fâsi batiâ, ju tacâ disint: «Raze di liparis! Cui us aial insegnât a cirî di scjampâ a l'ire ch' e sta par plombâus intor? Fasêt duncje oparis di vere conversion e no stait a inludisi disint: O vin Abram par pari. Parcè che us dîs che Diu al è bon di fâ saltâ für fîs di Abram ancje di chescj claps. La manarie e je za su lis lidrîs dai arbui; cussì ogni arbul che nol fâs pomis buinis al ven cjonçât e butât tal fûc. Jo us batii ta l'aghe par che si convertîs; ma chel ch' al ven daûr di me al è plui fuart di me e jo no merti nancje di puartâ i siei sandui. Al è lui che us batiarà tal Spiritu Sant e tal fûc: al à te man la pale par netâ il so curtîl; al ingrumarà il so forment sul cjast e al brusarà la pule cuntun fûc che no si distude mai».

Peraule dal Signôr.

III DOMENIE DI AVENT

PRIME LETURE

Il nestri Diu al ven e nus salvarà.

Dal libri dal profete Isaie

35,1-6.8.10

Che s'indalegrin il desert e la pustote,
ch'e gjoldi e ch'e florissi la tiere arsinide.
Come il zi ch'al floris di ogni bande,
che si jempli di gjonde e di ligrie.
I je stade dade la glorie dal Liban,
il sflandôr dal Carmêl e di Saron.
A viodaran la glorie dal Signôr,
il sflandôr dal nestri Diu.

Rinfuarçait lis mans ch'a colin,
dait vigorie ai zenôi ch'a clopin.

Disêt ai cûrs sconsortâts:
«Coragjo! No stait a vê pôre,
ve il uestri Diu!
Al ven cul svindic,
e je la pae di Diu,
lui al ven e us salvarà».

In chê volte si spalancaran i vòi dai vuarps,
e lis orelis dai sorts si vierzaran.

In chê volte il çuet al saltarà tant che un cerf,
e la lenghe dal mut e scriularà di gjonde,
parcè che lis aghis a spissularan tal desert
e i riui te pustote.

E sarà une strade monde,
che i disaran “Strade sante”;
nissun soç nol passarà par li;
e nancje chei cence sintiment no si pierdarán.
A tornaran par li i sfrancjâts dal Signôr,
e a jentraran in Sion berlant di gjonde;
une contentece eterne e splendarà sul lôr cjâf,
ligrie e contentece ur coraran daûr,
biel che l'aviliment e il zemit a scjamparan.

Peraule di Diu.

SALM RESPONSORIÂL

Dal Salm 145

R. Signôr, ven a salvânus.

o ben:

R. Aleluia, aleluia, aleluia.

Il Signôr al mantén la sô fedeltât par simpri.

Ur fâs justizie ai tibiâts,
ur da il pan a di chei ch'a son afamâts.

Il Signôr i presonîrs al libere. **R.**

I vòi dai vuarps il Signôr al torne a vierzi,
il Signôr al torne a tirâ sù chei ch'a son par tiere,
il Signôr i vûl ben a la int juste,
il Signôr al vuarde la int foreste. **R.**

Al viôt dal vuarfin e de vedue,
impen che lis trainis dai triscj lis savolte.
Il Signôr al regnarà par simpri:
il to Diu, Sion, di ete in ete. **R.**

SECONDE LETURE

Stait salts tai vuestris cûrs, parcè che la vignude dal Signôr e je dongje.

De letare di san Jacum apuestul

5,7-10

Tignît dûr, fradis miei, fintremai ch'al torne il Signôr. Cjalait il contadin: al spiete cun pazience ce che di bon e bute la tiere fin che nol à vudis lis plois de sierade e lis plois de vierte.

Ancje vualtris tignît dûr; stait salts tai vuestris cûrs, parcè che la vignude dal Signôr e je dongje. No stait a lagnâsi, fradis, un di chel altri, par no jessi judicâts. Ve che il judiç al è su la puarte. Tal sapuartâ e tal tignî dûr, fradis, cjapait esempli dai profetis, ch'a fevelin tal non dal Signôr.

Peraule di Diu.

CJANT AL VANZELI

Is 61,1

R. Aleluia, aleluia.

Il spirt dal Signôr Diu al è parsore di me,
mi à mandât a puartâur la buine gnone ai puars.

R. Aleluia.

VANZELI

Sêstu tu chel ch'al à di vignî, o vino di spietânt un altri?

Dal vanzeli seont Matieu

11,2-11

In chê volte, Zuan al vignì a savê, in preson, lis oparis dal Crist e midiant dai siei dissepui al mandà a dîi: «Sêstu tu chel ch'al à di vignî o vino di spietânt un altri?». Gjesù ur rispuindè: «Lait e contait a Zuan ce ch'o sintîs e o viodê: I vuarps a viodin, i çuets a cjaminin, i levrôs a son smondeâts, i sorts a sintin, i muarts a resussitin, ai puars ur è contade la buine gnone e al è furtunât chel che no si scandalize di me».

Intant che chei a levin vie, Gjesù si metè a fevelâ di Zuan a lis folis: «Po ce sêso lâts a viodi tal desert? Une cjane sdrondenade dal aiar? Po ce sêso lâts a viodi? Un om invuluçât in viestis finis? Ve: chei che si metin intor viestis finis a vivin tai palaçs dai rês. Po ce sêso lâts a fâ? A viodi un profete? Propit, us al dîs jo, e plui di un profete. Di lui al è scrit: “Ve, jo o mandi denant di te il gno mes, lui al prontarà denant di te la tô strade”.

Us al dîs in veretât: di ducj i nassûts di femine, nol è mai vignût fûr un plui grant di Zuan il Batiste. Ma il plui piçul tal ream dai cîi al è plui grant di lui».

Peraule dal Signôr.

IV DOMENIE DI AVENT

PRIME LETURE

Ve, la fantate e cjape sù e e parturîs un fi.

Dal libri dal profete Isaie

7,10-14

In chei dîs, il Signôr i à fevelât di gnûf a Acaz disint: «Domande par te un segnâl dal Signôr, to Diu, tant tal font di chel altri mont che tes altecis di lassù».

Ma Acaz al à rispuindût: «No domandarai nuie e no tentarai il Signôr».

Al à dit: «Scoltait, cjase di David! Esal pôc par vualtris stracâ i oms, ch'o volêts stracâ ancje il gno Diu? Pa la cuâl il Signôr in persone us darà un segnâl. Ve, la fantate e cjape sù e e parturîs un fi e i metarà non Emanuel: Diu cun nô».

Peraule di Diu.

SALM RESPONSORIAL

Dal Salm 23

R. Ve, al ven il Signôr, il re de glorie.

Dal Signôr e je la tiere cun dut ce ch'al è dentri,
il mont cun dut ce ch'al baline,
parcè che su lis aghis lui le à fondade
e su lis corints des aghis le à saldade. R.

Cui puedial lâ sù su la mont dal Signôr?
Cui puedial restâ te sô cjase sante?
Chel ch'al à cûr mont e mans nocentis,
che no si piert daûr di ce che nol à tignince
e che par ingjanâ nol zure. R.

Chest al varà la benedizion dal Signôr
e justizie dal Diu che lu salve.
Cheste e je la gjernazie di chei che lu cirin,
che dal Diu di Jacop a bramin la muse. R.

Alçaitsi, puartis eternis,
par ch'al jentri il re de glorie.
Po cui esal il re de glorie?
Il Signôr des schiriis, al è lui il re de glorie. R.

SECONDE LETURE

Gjesù Crist, de gjernazie di David, fi di Diu.

De letare di san Pauli apuestul ai Romans

1,1-7

Pauli, servidôr di Gjesù Crist, clamât a jessi apuestul, consacrât par predicjâ il vanzeli di Diu, che lui lu veve za imprometût midiant dai siei profetis tes Scrituris santis, a rivuart di so Fi, nassût seont la cjar de gjernazie di David, fat Fi di Diu cun fuarce seont il Spirt di santificazion midiant de resurezion dai muarts, Gjesù Crist nestri Signôr.

Midiant di lui o vin vude la gracie di apuestul par puartâ a l'ubidience de fede ducj i paians, a glorie dal so non. Fra di lôr o sêts ancje vualtris, clamâts di Gjesù Crist.

A ducj chei ch'a son in Rome, benvolûts di Diu e clamâts a jessi sants, a ducj vualtris gracie e pâs de part di Diu, Pari nestri, e dal Signôr Gjesù Crist.

Peraule di Diu.

CJANT AL VANZELI

Mt 1,23

R. Aleluia, aleluia.

Ve, la virgjine e cjaparà sù e e parturissarà un fi
che i metaran non Emanuel: "Diu cun nô".

R. Aleluia.

VANZELI

Gjesù al nassarà di Marie, femine di Josef, de gjernazie di David.

Dal vanzeli seont Matieu

1,18-24

La nassite di Gjesù e je sucedude cussì: sô mari Marie e jere imprometude a Josef; ma prime che lôr a tacassin a stâ insieme, al sucedè che jê e veve cjapât sù midiant dal Spiritu Sant. Josef, il so om, ch' al jere just e nol voleve disonorâle denant di ducj, al decidè di mandâle indaûr di scuindon.

Cuant che al veve za cjapade cheste decision, ve che un agnul dal Signôr i comparì in sium par dîi: «Josef, fi di David, no sta vê pôre a cjoli cun te Marie, la tô femine: ce che al è stât gjenerât in jê al è opare dal Spiritu Sant. E parturissarà un frut e tu i metarâs non Gjesù; al sarà lui di fat che al salvarà il so popul dai siei pecjâts».

Dut chest al è sucedût par che si colmâs ce che il Signôr al veve dit midiant dal profete:

“Ve, la virgjine e cjaparà sù e e parturissarà un fi che i metaran non Emanuel”, ch' al vûl dî “Diu cun nô”. Disveât dal sium, Josef al fasè come che i veve ordenât l'agnul dal Signôr e al cijolè cun sè la sô femine.

Peraule dal Signôr.

AN A

TIMP DI NADÂL

NADÂL DAL SIGNÔR

Inte Messe sore sere
de vee

Chestis leturis si doprilis inte Messe che si dîs sore sere dai 24 di dicembar, tant prime che dopo dai prins Gjespu di Nadâl.

PRIME LETURE

Il Signôr al cjate gust in te.

Dal libri dal profete Isaie

62,1-5

Par amôr di Sion no tasarái,
e par amôr di Gjerusalem no mi darai pâs,
fin che la sô justizie no crichi tant che l'albe
e la sô salvece no lusi tant che une torce.

In chê volte i forescj a viodaran la tô justizie
e ducj i rês la tô glorie,
e tu sarâs clamade cuntun non gnûf,
che la bocje dal Signôr lu disarà.

Tu sarâs une zoe sflandorose te man dal Signôr,
une corone reâl tal dret de man dal to Diu.

No ti disaran plui “Bandonade”,
parcè che ti disaran “Il gno gust al è in jê”,
e la tô tierie “Maridade”,
parcè che il Signôr al cjate gust in te,
e la tô tierie e varà un nuviç.

Propit, come un fantat al cjol une fantate,
ti maridarà chel che ti à fate sù;
e come che il nuviç si console cu la sô nuvice,
cussì il to Diu al gjoldarà di te.

Peraule di Diu.

SALM RESPONSORIÂL

Dal Salm 88

R. O vuei cjantâ il to boncûr, Signôr, cence polse.

Tu âs dite, Signôr:

«O ai fat un pat cun chel ch'o ai sielzût,
i ai fat un zurament a David, gno servidôr:
La tô gjernazie e restarà in pîts par simpri,
ti fasarai sù une sente di une ete in chê autre. R.

Lui mi clamarà: Tu tu sêts gno pari,
gno Diu e crete che mi pare.

I mantignarai par simpri il gno boncûr
e salde e sarà cun lui la mê aleance». R.

Furtunât il popul ch'al è bon di laudâti,
ch'al va indenant, Signôr, cul sfandôr de tô muse.
Tal to non dut il dì al è in gjonde,
te tô justizie al cjate la sô glorie. R.

SECONDE LETURE

Testemoneance di Pauli a rivuart di Crist, fi di David.

Dai Ats dai Apuestui

13,16-17.22-25

Pauli, rivât a Antiochie di Pisidie al jevâ sù e, fat segnâl cu la man, al disè: «Int di Israel e vualtris ch'o vêts timôr di Diu, scoltaitmi. Il Diu dal popul di Israel al à sielzût i nestris vons e al à fat cressi la nestre int cuant ch'a jerin in esili te tiere dal Egjit e cun braç fuart ju menâ vie di li.

E dopo di vê spodesít Saul dal ream, al à fat vignâ fûr par lôr il re David, disint di lui chestis peraulis: O ai ciatât David, fi di Jesse, un om seont il gno cûr, ch'al fasarà dut ce ch'o vuei jo.

De sô gjernazie, seont la promesse, Diu al tirâ fûr par Israel un salvadôr, Gjesù. Zuan al veve preparade la sô vignude predicjant un batisim di conversion a dut il popul di Israel.

Sul finî de sô mission, Zuan al diseve: Jo no soi chel che vualtris o crodês ch'o sedi. Ve ch'al sta rivant daûr di me un che jo nancje no merti di disgropâi i sandui».

Peraule di Diu.

CJANT AL VANZELI

R. Aleluia, aleluia.

Doman al sarà fiscât il pecjât de tierie
e il Salvadôr dal mont al regnarà sore di nô.

R. Aleluia.

VANZELI ★

Gjenealogje di Gjesù Crist, fi di David.

Dal vanzeli seont Matieu

1,1-25

Gjenealogje di Gjesù Crist, fi di David, fi di Abram. Abram al gjenerà Isac; Isac al gjenerà Jacop; Jacop al gjenerà Gjude e i siei fradis. Gjude al gjenerà Fares e Zare, di Tamar; Fares al gjenerà Esrom; Esrom al gjenerà Aram. Aram al gjenerà Aminadab; Aminadab al gjenerà Naasson; Naasson al gjenerà Salmon. Salmon al gjenerà Booz, di Racab; Booz al gjenerà Obed, di Rut. Obed al gjenerà Jesse; Jesse al gjenerà il re David.

David al gjenerà Salomon, di chê ch'e jere stade la femine di Urie. Salomon al gjenerà Roboam; Roboam al gjenerà Abie; Abie al gjenerà Asaf. Asaf al gjenerà Gjosafat; Gjosafat al gjenerà Joram; Joram al gjenerà Ozie. Ozie al gjenerà Joatam; Joatam al gjenerà Acaz; Acaz al gjenerà Ezechie. Ezechie al gjenerà Manasse; Manasse al gjenerà Amos; Amos al gjenerà Gjosie. Gjosie al gjenerà Jeconie e i siei fradis instant de depuertazion in Babilonie.

Dopo de depuertazion in Babilonie, Jeconie al gjenerà Salatiel; Salatiel al gjenerà Zorobabel. Zorobabel al gjenerà Abiud; Abiud al gjenerà Eliacim; Eliacim al gjenerà Azor; Azor al gjenerà Sadoc; Sadoc al gjenerà Achim; Achim al gjenerà Eliud; Eliud al gjenerà Eleazar; Eleazar al gjenerà Matan; Matan al gjenerà Jacop. Jacop al gjenerà Josef, l'om di Marie; di jê al è nassût Gjesù, che lu clamin Crist.

Partant il numar di dutis lis gjenerazions al è: di Abram a David cutuardis gjenerazions; di David a la depuertazion in Babilonie cutuardis gjenerazions; de depuertazion in Babilonie fint a Crist cutuardis gjenerazions.

La nassite di Gjesù e je sucedude cussì: sô mari Marie e jere imprometude a Josef; ma prime che lôr a tacassin a stâ insieme, al sucedè che jê e veve cjapât sù midiant dal Spirtu Sant. Josef, il so om, ch'al jere just e nol voleve disonorâle denant di ducj, al decidè di mandâle indaûr di scuindon. Cuant che al veve za cjapade cheste decision, ve che un agnul dal Signôr i comparì in sium par dîi: «Josef, fi di David, no sta vê pôrre a cjoli cun te Marie, la tô femine: ce che al è stât gjenerât in jê al è opare dal Spirtu Sant. E parturissarà un frut e tu i metarâs non Gjesù; al sarà lui di fat che al salvarà il so popul dai siei pecjâts».

Dut chest al è sucedût par che si colmâs ce che il Signôr al veve dit midiant dal profete: “Ve, la virgjine e cjaparà sù e e parturissarà un fi che i metaran non Emanuel”, ch’al vûl dî “Diu cun nô”. Disveât dal sium, Josef al fasè come che i veve ordenât l’agnul dal Signôr e al cjolè cun sè la sô femine; ma nol lè dongje di jê fintremai a la nassite dal fi, che i metè non Gjesù.

Peraule dal Signôr.

Forme curte:

Marie e parturissarà un fi e tu tu i metarâs non Gjesù.

Dal vanzeli seont Matieu

1,18-25

La nassite di Gjesù e je sucedude cussì: sô mari Marie e jere imprometude a Josef; ma prime che lôr a tacassin a stâ insieme, al sucedè che jê e veve cjapât sù midiant dal Spirtu Sant.

Josef, il so om, ch'al jere just e nol voleve disonorâle denant di ducj, al decidè di mandâle indaûr di scuindon. Cuant che al veve za cjapade cheste decision, ve che un agnul dal Signôr i comparì in sium par dîi: «Josef, fi di David, no sta vê pôrre a cjoli cun te Marie, la tô femine: ce che al è stât gjenerât in jê al è opare dal Spirtu Sant. E parturissarà un frut e tu i metarâs non Gjesù; al sarà lui di fat che al salvarà il so popul dai siei pecjâts».

Dut chest al è sucedût par che si colmâs ce che il Signôr al veve dit midiant dal profete: “Ve, la virgjine e cjaparà sù e e parturissarà un fi che i metaran non Emanuel”, ch’al vûl dî “Diu cun nô”. Disveât dal sium, Josef al fasè come che i veve ordenât l’agnul dal Signôr e al cjolè cun sè la sô femine; ma nol lè dongje di jê fintremai a la nassite dal fi, che i metè non Gjesù.

Peraule dal Signôr.

Pes Massis di Nadâl si dopre chescj trê formularis, cul ordin che a son disponûts. Però si pues sielzi, jenfri lis leturis des trê Massis - simpri seont il lôr ordin (Vieri Testament, Apuestui, Vanzeli) - chêz che pastoralmentri si ritegnin plui adatis a la semblee che e cjape Messe.

NADÂL DAL SIGNÔR

Inte Messe dai madins

PRIME LETURE

Nus è stât dât un fi.

Dal libri dal profete Isaie

9,1-3,5-6

Il popul ch' al leve indenant tal scûr
al à viodude une grande lûs;
sun chei ch' a jerin a stâ tune tiere scure
e à lusît une lûs.

Tu âs moltiplicade la gjonde
tu âs fate cressi la ligrie.
A gjoldin denant di te
come che si gjolt tal seselâ,
come che si scriule
cuant che si spartîs la prede.
Parcè che il so jôf ch' al sfracaiave,
la scorie su lis sôs spalis,
il baston dal so vuardean
tu tu lu âs crevât come te dì di Madian.

Parcè che nus è nassût un frut,
nus è stât dât un fi;
su lis sôs spalis al polse il comant;
e si clamilu par non:
“Conseîr maraveôs, Diu potent,
Pari par simpri, Princip de pâs”,
par ch' al puedi slargjâ la paronance
e par une pâs cence fin,
su la sente di David e sul so ream,
par stabilîlu e par rinfuarçâlu
midiant dal dirit e de justizie
di cumò e par simpri.
Chest lu fasarà la passion dal Signôr.

Peraule di Diu.

SALM RESPONSORIÂL

Dal Salm 95

R. Vuê al è nassût par nô il Salvadôr.

Cjantait al Signôr une cjante gbove,
cjantait al Signôr di dute la tiere.

Cjantait al Signôr, il so non onoraitlu. R.

Contait di une dì daûr chê altre la sô salvece.

A ducj i forescj contait de sô glorie,
framieç di ducj i popui i siei spetacui. R.

Ch' a gjoldin i cîi, che s'indalegri la tiere,
che si sgrisuli il mår cun dut ce ch' al à dentri;
la campagne cun dut il so sflandôr, ch'e fasi fieste,
ducj i arbui dal bosc che s'indalegrin. R.

Ch' a gjubilin denant dal Signôr ch' al rive,
ch' al ven a judicâ la tiere.

Al judicarà il mont cun justizie
e i popui cu la sô fedeltât. R.

SECONDE LETURE

E je comparide la gracie di Diu, che ur à puartade la salvece a ducj i oms.

De letare di san Pauli apuestul a Tito

2,11-14

Benedet, e je comparide la gracie di Diu, che ur à puartade la salvece a ducj i oms e nus à insegnât a vivi in chest mont cun sintiment, cun justizie e religion, rinunciant a la tristere e a lis vois dal mont e spietant la sante sperance e la manifestazion de glorie dal grant Idu e nestri salvadôr Gjesù Crist, che si è dât vie dut par nô par sfrancjâns di ogni inicuitât e purificâ par sè un popul ch'al sedi dome so e al vedi grande passion tal fâ oparis di ben.

Peraule di Diu.

SECUENCE

GRATES NUC OMNES

Pandìn ducj insieme il nestri agrât al Signôr Idu,
che cu la sô nassite nus à liberâts
de paronance dal diaul.

Al è propit just che,
insieme cui agnui,
o cjanìn cence soste:
“Glorie tal plui alt dai cîi”.

CJANT AL VANZELI

Cfr. Lc 2,10-11

R. Aleluia, aleluia.

Us puarti une gnoive che us jemplarà di grande gjonde:
vuê us è nassût un Salvadôr: Crist Signôr.

R. Aleluia.

VANZELI

Vuê us è nassût il Salvadôr.

Dal vanzeli seont Luche

2,1-14

In chei dîs al saltâ fûr un edit di Cesar August ch'al ordenave il censiment di dute la tiere. Chest prin censiment al fo fat cuant che al jere governadôr de Sirie Cuirin. A levin ducj a dâ il lôr non, ognidun inte sô citât.

Ancje Josef de Galilee, de citât di Nazaret, al lè sù te Gjudee, te citât di David che i disin Betlem, parcè che al jere de cjase e de famee di David, par dâ il so non insieme cun Marie, la sô femine, ch'e stave spietant. Intant ch'a jerin li, al rivâ par jê il temp di parturî e e parturì il so prin fi. Lu invuluçà tes fassis e lu poià intune grepie, parcè che inte locande nol jere puest par lôr.

In chê stesse region a jerin pastôrs: a veglavin te campagne e vie pe gnot a fasevin la vuaite al lôr trop. L'agnul dal Signôr si presentâ denant di lôr e la glorie dal Signôr ju invuluçà di lûs, che di fat a cjaparin un grant spavent. Ma l'agnul ur disè: «No stait a vê pôre, parcè che us puarti une gnoive ch'e jemplarà di gjonde dut il popul: vuê, te citât di David, us è nassût un salvadôr, ch'al è il Messie, Signôr. E chest us servissarà di segnâl: o cjatarêns un frut invuluçât tes fassis e pognet intune grepie». E a colp si compagnâ cul agnul une fulugne de schirie dal cîl ch'e laudave Diu cussì:

«Glorie a Diu tal plui alt dai cîi
e pâs in tiere ai oms che lui ur vûl ben».

Peraule dal Signôr.

NADÂL DAL SIGNÔR

Inte Messe sul crichedì

PRIME LETURE

Ve, al sta rivant il to Salvadôr.

Dal libri dal profete Isaie

62,11-12

Ve, il Signôr al fâs sintî
fin tai confins dal mont:

«Disêt a la fie di Sion:
Ve, al sta rivant il to Salvadôr,
ve, al à daûrsi il so salari,
e la sô pae e je denant di lui.

Ur disaran “Popul sant”,
“Sfrancjâts dal Signôr”,
e a ti ti disaran “Cirude”,
“Citât mai bandonade”».

Peraule di Diu.

SALM RESPONSORIÂL

Dal Salm 96

R. Vuê sore di nô e sflandore la lûs.

Il Signôr al regne! Ch'e gjoldi la tiere,
che s'indalegrin dutis lis isulis.

I cîi a contin la sô justizie
e ducj i popui a restin pe sô glorie. **R.**

Pai onescj une lûs si è impiade,
par chei ch'a an il cûr just une reson di ligrie.

Gjoldêt, onescj, tal Signôr,
il so non sant onoraitlu. **R.**

SECONDE LETURE

Nus à salvâts pal so boncûr.

De letare di san Pauli apuestul a Tito

3,4-7

Benedet, cuant che e je comparide la bontât di Diu nestri salvadôr e il so amôr pai oms, lui nus à salvâts no in virtût des oparis ch'o varessin vudis fatis te justizie, ma seont il so boncûr, cuntune lavade di rigjenerazion e di rinnovament tal Spirtu Sant che lui al à sborfât sore di nô cence culumie midiant di Gjesù Crist nestri salvadôr, par che, justificâts cu la sô gracie, o deventassin erêts de vite eterne seont la sperance.

Peraule di Diu.

SECUENCE

EYA RECOLAMUS LAUDIBUS

Dai, cjantìn ancjemò une volte
cun laudis plenis di religjon
i cjants che si convegnin a cheste zornade
là che si è impiade par nô
une lûs cussì cjare.

Intal scûr de gnot al sparîs
il scûr dai nestris delits.
Vuê la stele dal mâr i à parturît al mont la gjonde
di une salvece gnove.

Denant di lui a trimin i abîs plui fonts:
parfin la muart insanganade e à pôre
denant di chel che le fasarà murî.
E zem presonirie la ruvine antighe;
il sarpint neri di invidie al piert lis sôs predis.

L'om colât, la piore slontanade
e ven tornade a clamâ a la gjonde eterne.
In cheste dì a gjoldin
lis schiriis celestis dai agnui,
parcè che la decime dracme, pierdude,
e je stade cjatade.

O colpe cetant furtunade,
che in gracie di jê e ven sfrancjade dute la nature.
Diu, ch'al à créât dut,
al nas di une femine.
Une nature maraveose si riviestîs in maniere straordenarie:
al cjape sù ce che nol jere;
al reste ce ch'al jere.

Il bon pastôr al è vignût a cirî ce ch'al jere pierdût.
Al met sù l'elmet; al combat cun tant di armadure,
come un soldât.
Il nemì, distirât, al plombe jù
propit intai siei spicots e i vegnin gjavadis lis armis.
Al è spartît il so rafât, ch'al faseve tant fidament;
la sô prede i je stade puartade vie.

La batae tremende di Crist
e je la nestre vere salvece;
lui che nus à menâts inte sô patrie
dopo de vitorie.
E lassù si perpetue la sô laude.

CJANT AL VANZELI

Lc 2,14

R. Aleluia, aleluia.

Glorie a Diu tal plui alt dai cîi
e pâs in tiere ai oms che lui ur vûl ben.

R. Aleluia.

VANZELI

I pastôrs a cjatarin Marie, Josef e il frut.

Dal vanzeli seont Luche

2,15-20

A1 sucedè che, a pene che i agnui si slontanarin di lôr par lâ viers il cîl, i pastôrs si disevin un cul altri:
«Anìn fint a Betlem a viodi ce ch'al è sucedût e che il Signôr nus à fat savê».

A lerin duncje in presse e a cjatarin Marie, Josef e il frut ch' al jere pognet inte grepie. Dopo di vê viodût, a contarin ce che ur jere stât dit dal frut. Ducj chei ch'a sintivin si davin di maravee des robis che i pastôrs a contavin.

Marie, par chel che le rivuardave, e tignive cont di dutis chestis robis meditantlis tal so cûr.

Po i pastôrs a tornarin indaûr glorificant e laudant Diu par dut ce ch'a vevin sintût e viodût, come che ur jere stât contât.

Peraule dal Signôr.

NADÂL DAL SIGNÔR

Inte Messe dal dì

PRIME LETURE

Ducj i confins de tiere a viodaran la salvece dal nestri Diu.

Dal libri dal profete Isaie

52,7-10

Cetant biei ch'a son su pes monts
i pîts dal mes,
ch'al proclame la pâs,
ch'al puarte une buine gnone,
ch'al conte la salvece,
che i dîs a Sion:
«Il to Diu al regne»!

Une vôs! Lis tôs vuaitis a alcin la vôs,
ducj a berlin di gjonde,
parcè che a viodin cui lôr vôi
il Signôr, ch'al torne in Sion.

Scriulait, berlait insieme,
ruvinis di Gjerusalem!
Parcè che il Signôr al confuarte il so popul,
al sfrancje Gjerusalem.

Il Signôr al à distaponât il braç de sô santitât
denant di ducj i popui,
e ducj i confins de tiere
a viodaran la salvece dal nestri Diu.

Peraule di Diu.

SALM RESPONSORIÂL

Dal Salm 97

R. Dute la tiere e à viodude la salvece dal Signôr.

Cjantait al Signôr une cjante gnone,
parcè che al à fatis robonis.
Lu à fat vinci la sô gjestre,
il braç de sô santitât. **R.**

Il Signôr al à palesade la sô salvece,
in face di ducj i popui
al à pandude la sô justizie.
Si è visât dal so boncûr,
de sô fedeltât pe cjase di Israel. **R.**

Ducj i confins de tiere a an viodude

la salvece dal nestri Diu.
Che i cjanti al Signôr dute la tiere,
berlait, scriulait cu lis cjantis plui legris. **R.**

Fasêt al Signôr une cjante cu la citare,
cu la citare e cul sun dal salteri;
cul sun dal cuar e cu lis trombis;
in face dal re, dal Signôr scriulait. **R.**

SECONDE LETURE

Diu nus à fevelât a nô midiant dal Fi.

De letare ai Ebreos

1,1-6

Diu, ch'al veve za fevelât tai temps antîcs une vore di voltis e in cetancj mûts ai paris midiant dai profetis, in chescj dîs, ch'a son i ultins, nus à fevelât a nô midiant dal Fi, che lu à metût erêt di dut e che midiant di lui al à fat ancje il mont.

Chest Fi, ch'al è il sflandôr de sô lûs e il stamp dal so jessi e ch'al ten sù dut cu la fuarce de sô peraule, dopo di vénus smondeâts dai pecjâts, si è sentât a la gjestre de maiestât adalt tai cîi, e al è deventât tant plui grant dai agnui come che plui grant dal lôr al è il non ch'al à ereditât.

Di fat a cuâl dai agnui Diu i aial mai dit: “Tu tu sê sgnof fi; jo vuê ti ai fat nassi?” E ancje: “Jo o sarai par lui pari e lui al sarà par me fi?” E ancjemò, cuant ch'al presente il prin fi tal mont, al dîs: “Lu adoraran ducj i agnui di Diu”.

Peraule di Diu.

SECUENCE

NATUS ANTE SÆCULA

Al è nassût prin di ducj i secui il Fi dal Diu invisibil e infinît,
che midiant di lui al è stât fat l'implant dal cîl,
de tiere, dal mår e di ducj chei che li dentri a vivin.

Midiant di lui a scorin e si incrosin i dîs e lis oris.
I agnui a cjantin cence soste la sô glorie
te plui alte inmensitât dal cîl.

Par lavâ la colpe e la sporcjetât dal prin gjenitôr,
de cjar de Virgjine Marie lui al à cjapât sù un cuarp debul,
ma cence la magle de colpe origjinâl.

Cheste zornade e fevele cu la lûs che si slungje simpri di plui,
parcè che il Soreli vêr, cul rai de sô lûs,
al à netade vie la viere scuretât dal mont.

La gnot no reste cence la lûs de gnove stele:
di fat le viodin i vîoi scaturîts dai magjos.

Nancje ai vuardeans dai tropur à mancjade la lûs:
ju à inceâts il sflandôr des schiriis divinis.

Gjolt, mari di Diu, che ator di te, impen des comaris,
tu âs i agnui ch'a cjantin la glorie dal Signôr.

Crist, Fi unigenit dal Pari,
tu che tu âs cjapade sù la forme de nestre umanitât,
sclipìs il cûr di chei che ti prein.

Indegniti, Gjesù, di acetâ di bon voli lis preieris

di chei che tu âs volût vê part cun lôr.
E fâsiju vê part de tô divinitât, o Diu e unigjenit di Diu.

CJANT AL VANZELI

R. Aleluia, aleluia.

Une zornade sante e à cricât par nô:
vignît ducj a adorâ il Signôr;
vuê une lûs sfandorose e je vignude jù su la tiere.

R. Aleluia.

VANZELI ★

Il Verbo si è fat cjar e al è vignût a stâ framieç di nô.

Dal vanzeli seont Zuan

1,1-18

Tal imprin al jere il Verbo
e il Verbo al jere daprûf di Diu
e Diu al jere il Verbo.
Lui al jere tal imprin daprûf di Diu.
Dut al è stât fat midiant di lui
e cence di lui nol è stât fat
propit nuie di ce ch' al è stât fat.

In lui e jere la vite
e la vite e jere la lûs dai oms;
e la lûs e fâs lûs tal scûr
ma il scûr nol à rivât a cjapâle.

Al fo un om mandât di Diu,
il so non al jere Zuan.
Lui al vignì come testemoni
par fâi di testemoni a la lûs,
par che ducj a crodassin midiant di lui.
Nol jere lui la lûs,
ma par fâi di testemoni a la lûs.

E jere la lûs vere,
che i fâs lûs a ogni om,
chê ch'e vignive tal mont.

Al jere tal mont
e il mont al è stât fat midiant di lui
e il mont no lu à ricognossût.

Al è vignût in cjase sô
e i siei no lu an acetât.

Però a di chei che lu an acetât
ur à dât il podê di deventâ fîs di Diu,
a di chei ch'a crodin tal so non,
che no par vie di sanc
ni par volontât di cjar
ni par volontât di om
ma di Diu a son stâts gjenerâts.

E il Verbo si è fat cjar
e al è vignût a stâ framieç di nô
e nô o vin viodule la sô glorie,
glorie come di unigjenit dal Pari

plen di gracie e di veretât.

Zuan al fâs di testemoni par lui
e al proclame: «Chel chi al jere chel che o disevi:
Chel ch'al ven dopo di me
al è passât denant di me
parcè che al jere prin di me».
Di fat de sô plenece
ducj nô o vin cjapât
e gracie sore gracie;
parcè che la leç e je stade dade midiant di Mosè,
e la gracie e la veretât
a son deventadis realtât midiant di Gjesù Crist.

Diu nissun no lu à mai viodût.

L'unigjenit Diu,
ch'al è tal grim dal Pari,
propit lui nus al à pandût.

Peraule dal Signôr.

Forme curte:

Dal vanzeli seont Zuan

1,1-5.9-14

Tal imprin al jere il Verbo
e il Verbo al jere daprûf di Diu
e Diu al jere il Verbo.
Lui al jere tal imprin daprûf di Diu.
Dut al è stât fat midiant di lui
e cence di lui nol è stât fat
propit nuie di ce ch'al è stât fat.
In lui e jere la vite
e la vite e jere la lûs dai oms;
e la lûs e fâs lûs tal scûr
ma il scûr nol à rivât a cjapâle.

E jere la lûs vere,
che i fâs lûs a ogni om,
chê ch'e vignive tal mont.

Al jere tal mont
e il mont al è stât fat midiant di lui
e il mont no lu à ricognossût.
Al è vignût in cjase sô
e i siei no lu an acetât.
Però a di chei che lu an acetât
ur à dât il podê di deventâ fîs di Diu,
a di chei ch'a crodin tal so non,
che no par vie di sanc
ni par volontât di cjar
ni par volontât di om
ma di Diu a son stâts gjenerâts.

E il Verbo si è fat cjar
e al è vignût a stâ framieç di nô
e nô o vin viodule la sô glorie,
glorie come di unigjenit dal Pari
plen di gracie e di veretât.

Peraule dal Signôr.

I domenie dopo Nadâl

**SANTE FAMEE DI GJESÙ
MARIE E JOSEF**

PRIME LETURE

Chel ch' al à timôr dal Signôr al onore i gjenitôrs.

Dal libri dal Fi di Sirac

3,2-6.12-14

Il Signôr al vûl che il pari al sedi onorât dai fîs,
al à imponût sui fîs il dirit de mari.

Chel ch' al rispiete il pari al pare jù i pecjâts
e chel ch' al onore la mari al ingrume tesaurs.

Chel ch' al rispiete il pari al varà gjonde dai fîs
e te dì de sô preiere al sarà scoltât.

Chel ch' al onore il pari al varà vite lungje,
chel ch' al ubidîs il Signôr al console la mari.

Fi, viôt dal pari cuant che al è vieli
e no sta dâi displasêts fin ch' al è in vite;
ancje s' al piert il sintiment, compatissilu,
no sta spreseâlu dome parcè che tu sês tal colm de vigorie.

La compassion pal pari no sarà dismenteade,
e sarà un tesaure par parâ jù i pecjâts.

Peraule di Diu.

SALM RESPONSORIÂL

Dal Salm 127

R. Vite e benedizion su la cjase di chel che al à timôr dal Signôr.

Furtunâts chei ch' a rispietin il Signôr
e pai siei trois a cjaminin!
De fadie des tôs mans tu mangjarâs;
tu varâs furtune e ben di ogni sorte. **R.**

La tô femine tant che une vît ch' e bute
te intimitât de tô cjase;
i tiei fîs tant che menadis di ulîf
torator de tô taule. **R.**

Ve cemût ch' al è benedît
l'om ch' al rispiete il Signôr.
Che il Signôr ti benedissi di Sion,
par che tu gjoldis de bondance di Gjerusalem
ducj i dîs de tô vite. **R.**

SECONDE LETURE

Vite di une famee cristiane seont il comandament dal amôr.

De letare di san Pauli apuestul ai Colossêts

3,12-21

Fradis, vualtris duncje, come elets di Diu, sants e benvolûts, visfîtsi de compassion plui dolce, di bontât,
di umiltât, di mitece, di pazience, sapuartantsi un cul altri e perdonantsi s'al capite che un si lamenti di un

altri.

Come che il Signôr us à perdonât, cussì fasêt ancje vualtris. Parsore di dutis chestis robis però al à di jessi l'amôr, ch' al è il leam de perfezion. E la pâs di Crist ch'e regni di parone tai vuestris cûrs, parcè che in jê o sêts stâts clamâts a jessi un sôl cuarp. E viodêt di jessi int che e ringrazie!

La peraule di Crist ch'e sedi di cjase in vualtris cun dute la sô ricjece; istruîtsi e conseaitsi un cul altri cun dute la sapience. Cjantait a Diu tai vuestris cûrs cun ricognossince, cun salms, laudis e cjantis spirtuâls. E dut ce che o disêts e o fasêts, fasêtlu simpri tal non dal Signôr Gjesù, ringraziant Diu Pari midiant di lui.

Feminis, stait sotponudis ai vuestris oms, come che si conven tal Signôr. Oms, volêt ben a lis vuestris feminis e no stait a jessi malegraciôs cun lôr. Fîs, ubidît i vuestris gjenitôrs in dut, parcè che al Signôr i plâs cussì. Paris, no stait a tirâ masse la cuarde cui vuestris fîs, par no che si pierdin di spirt.

Peraule di Diu.

CJANT AL VANZELI

Col 3,15.16

R. Aleluia, aleluia.

La pâs di Crist ch'e regni tai vuestris cûrs;
la peraule di Crist ch'e sedi di cjase in vualtris
cun dute la sô ricjece.

R. Aleluia.

VANZELI

Cjape sù cun te il frut e sô mari e scjampe in Egjît.

Dal vanzeli seont Matieu

2,13-15.19-23

Partîts i magjos, ve che un agnul dal Signôr i comparì in sium a Josef e i disè: «Dai, jeve, cjape sù cun te il frut e sô mari e scjampe in Egjít e reste là jù fin che no tornarai a visâti. Di fat Erode al sta cirint il frut par copâlu».

Lui al jevà, al cjapà sù cun sè il frut e sô mari a dute gnot e al partì pal Egjít. Là jù al restà fint a la muart di Erode. Chest par che si colmâs ce ch'al veve dit il Signôr midiant dal profete, là ch'al dîs: «Dal Egjít o ai clamât indaûr gno fi».

Dopo de muart di Erode, ve che un agnul dal Signôr i comparì in sium a Josef in Egjít e i disè: «Jeve, cjape sù cun te il frut e sô mari e va inte tiere di Israel; di fat a son muarts chei che a metevin in pericul la vite dal frut».

Lui al jevà, al cjapà sù cun sè il frut e sô mari e si invià pe tiere di Israel. Ma cuant che al vignì a savê che in Gjudee al regnave Archelao, tal puest di so pari Erode, al cjapà pôre di lâ li. Visât però in sium, al lè a stâ te tiere de Galilee e, rivât li, si stabilì te citât che i disevin Nazaret. Chest par che si colmâs la peraule dai profetis: «Lu clamaran Nazaren».

Peraule dal Signôr.

1 di Zenâr

SOLENITÂT DI SANTE MARIE MARI DI DIU

PRIME LETURE

A clamaran il gno non e jo ju benedissarai.

Dal libri dai Numars

6,22-27

Il Signôr i fevelà a Mosè e i disè: «Feveliur a Aron e ai siei fîs e disiur: O benedissarêts cussì i fîs di

Israel. Ur disarêș:

Che il Signôr ti benedissi
e ti tegni vuardât.

Che il Signôr al fasi lusî la sô muse parsore di te
e ti vedi agrât.

Che il Signôr al alci la sô muse sore di te
e ti dedi pâs.

E cussì a metaran il gno non sui fîs di Israel,
e jo ju benedissarai».

Peraule di Diu.

SALM RESPONSORIÂL

Dal Salm 66

R. Che Diu nus benedissi cu la lûs de sô muse.

Che Diu al vedi dûl di nô e nus benedissi,
ch' al fasi lusî parsore di nô la sô muse,
par che si cognossi su la tiere la tô strade,
framieç dai forescj la tô salvece. R.

Ch'a gjubilin i forescj e a berlin di gjonde,
parcè che tu tu judichis i popui cun justizie
e i forescj de tiere tu ju dâs dongje. R.

Che ti laudin i popui, Diu,
che ti laudin i popui di dute la tiere.

Che nus benedissi Diu,
par che lu rispietin ducj i confins de tiere. R.

SECONDE LETURE

Diu al à mandât so Fi, nassût di une feminine.

De letare di san Pauli apuestul ai Galazians

4,4-7

Fradis, cuant che e je rivade la colme dal temp, Diu al à mandât so Fi, nassût di une feminine, sot de leç, par podê sfrancjâ chei ch'a jerin sot de leç, par ch'o deventassin fîs di anime. Dal moment ch'o sêș fîs, Diu al à mandât il Spirt di so Fi tai nestris cûrs, il Spirt ch'al berle: Abà, Pari! E cussì no tu sêș plui sotan ma fi; se fi, tu sêș ancje erêt par volê di Diu.

Peraule di Diu.

CJANT AL VANZELI

Cfr. Eb 1,1.2

R. Aleluia, aleluia.

Diu, tai temps antîcs al à fevelât
une vore di voltis e in cetancj mûts
ai nestris paris midiant dai profetis;
vuê, invezit, nus fevele a nô midiant dal Fi.

R. Aleluia.

VANZELI

I pastôrs a cjatarin Marie, Josef e il frut.

Dal vanzeli seont Luche

2,16-21

In chê volte, i pastôrs a lerin in presse e a cjatarin Marie, Josef e il frut ch' al jere poguet inte grepie. Dopo di vê viodût, a contarin ce che ur jere stât dit dal frut.

Ducj chei ch' a sintivin si davin di maravee des robis che i pastôrs a contavin. Marie, par chel che le rivuardave, e tignive cont di dutis chestis robis meditantlis tal so cûr.

Po i pastôrs a tornarin indaûr glorificant e laudant Diu par dut ce ch' a vevin sintût e viodût, come che ur jere stât contât.

Passâts i vot dîs par circuncidilu, i meterin il non di Gjesù, come ch' al jere stât clamât dal agnul prime che sô mari lu cjapàs sù tal grim.

Peraule dal Signôr.

II DOMENIE DOPO NADÂL

PRIME LETURE

La sapience di Diu e je vignude a stâ intal popul elet.

Dal libri dal Fi di Sirac

24,1-4.8-12

La sapience e laude sè stesse
e si vante tal mieç dal so popul.
E vierç la bocje te semblee dal Altissim
e si vante denant de cort dal cîl:

«Jo o soi saltade fûr de bocje dal Altissim,
e tant che un nûl o ai cuvierzude la tiere.
O ai stât a stâ lassù adalt tal cîl,
o vevi la sente tune colonne di nûi.
Alore chel ch' al à créât dut mi à dât un ordin,
il gno creadôr mi à dât un sít par polsâ
e mi à dit: Met la tende in Jacop,
cjol come ereditât Israel.

Lui mi à creade tal imprin, prime dal temp,
e no sparissarai par dute l'eternitât.
O ai funzionât denant di lui, te tende sacre,
cuant che mi soi sistemade in Sion.
Te citât che lui al ame mi à fate fermâ,
cumò la mê paronance e je in Gjerusalem.
O ai metudis lidrîs tun popul gloriôs,
o ai vude la legitime tal toc dal Signôr».

Peraule di Diu.

SALM RESPONSORIÂL

Dal Salm 147

R. Il Verbo si è fat cjar
e al è vignût a stâ framieç di nô.

o ben:

R. Aleluia, aleluia, aleluia.

Gjerusalem, dai glorie al Signôr,
Sion, laude il to Diu;
parcè che al à rinfuarçâts i clostris des tôs puartis,
al à benedît i tiei fîs dentrivie. **R.**

Tai tiei confins lui al à metude pâs,

cu la flôr dal forment ti sostente.
Al mande su la tierie i siei ordins,
e cor biel svelte la sô peraule. **R.**

I conte a Jacop la sô peraule,
a Israel i siei decrets e lis sôs sentencis.
Chest no lu à fat cun nissun altri popul,
a nissun di lôr no ur à pandûts i siei judizis. **R.**

SECONDE LETURE

Diu nus à predistinâts a jessi siei fîs di anime.

De letare di san Pauli apuestul ai Efesins

1,3-6.15-18

Benedet Diu e Pari dal Signôr nestri Gjesù Crist,
che tai cîi nus à colmâts
di ogni sorte di benedizion spirituâl in Crist.
Nus à sielzûts in lui prin de creazion dal mont,
par ch'o fossin sants e cence magle denant di lui tal amôr.
Lui nus à predistinâts a jessi siei fîs di anime,
midiant di Gjesù Crist,
seont il disen plen di boncûr de sô volontât,
a laude dal sflandôr de sô gracie
che nus à gratificâts tal so Fi plui cjâr.

Par chel anciejo, ch'o ai sintût a fevelâ de vuestre fede tal Signôr Gjesù e dal vuestri bonvolê par ducj i sants, no fermi di ringraziâ par vualtris, ricuardantjus tes mês preieris, par che il Diu dal Signôr nestri Gjesù Crist, il Pari de glorie, us dedi un spirt di sapience e di rivelazion par cognossilu miei. Ch'al inlumini i vòi de vuestre inteligence par ch'o podêts rivâ a capî cuale ch'e je la sperance de sô clamade, cuale ch'e je la ricjece de sô ereditât gloriose framieç dai sants.

Peraule di Diu.

CJANT AL VANZELI

Cfr. 1Tm 3,16

R. Aleluia, aleluia.

Glorie a ti, o Crist, predicjât a ducj i popui;
glorie a ti, o Crist, crodût intal mont.

R. Aleluia.

VANZELI ★

Il Verbo si è fat cjâr e al è vignût a stâ framieç di nô.

Dal vanzeli seont Zuan

1,1-18

Tal imprin al jere il Verbo
e il Verbo al jere daprûf di Diu
e Diu al jere il Verbo.
Lui al jere tal imprin daprûf di Diu.
Dut al è stât fat midiant di lui
e cence di lui nol è stât fat
propit nuie di ce ch'al è stât fat.
In lui e jere la vite
e la vite e jere la lûs dai oms;
e la lûs e fâs lûs tal scûr
ma il scûr nol à rivât a cjapâle.

Al fo un om mandât di Diu,
il so non al jere Zuan.
Lui al vignì come testemoni
par fâi di testemoni a la lûs,
par che ducj a crodessim midiant di lui.
Nol jere lui la lûs,
ma par fâi di testemoni a la lûs.

E jere la lûs vere,
che i fâs lûs a ogni om,
chê ch'e vignive tal mont.
Al jere tal mont

e il mont al è stât fat midiant di lui
e il mont no lu à ricognossût.

Al è vignût in cjase sô
e i siei no lu an acetât.

Però a di chei che lu an acetât
ur à dât il podê di deventâ fîs di Diu,
a di chei ch'a crodin tal so non,
che no par vie di sanc
ni par volontât di cjar
ni par volontât di om
ma di Diu a son stâts gjenerâts.

E il Verbo si è fat cjar
e al è vignût a stâ framieç di nô
e nô o vin viodude la sô glorie,
glorie come di unigenit dal Pari
plen di gracie e di veretât.

Zuan al fâs di testemoni par lui
e al proclame: «Chel chi al jere chel che o disevi:
Chel ch'al ven dopo di me
al è passât denant di me
parcè che al jere prin di me».

Di fat de sô plenece
ducj nô o vin cjapât
e gracie sore gracie;
parcè che la leç e je stade dade midiant di Mosè,
e la gracie e la veretât
a son deventadis realtât midiant di Gjesù Crist.

Diu nissun no lu à mai viodût.

L'unigenit Diu,
ch'al è tal grim dal Pari,
propit lui nus al à pandût.

Peraule dal Signôr.

Forme curte:

Dal vanzeli seont Zuan

1,1-5.9-14

Tal imprin al jere il Verbo
e il Verbo al jere daprûf di Diu
e Diu al jere il Verbo.
Lui al jere tal imprin daprûf di Diu.
Dut al è stât fat midiant di lui

e cence di lui nol è stât fat
propit nuie di ce ch'al è stât fat.
In lui e jere la vite
e la vite e jere la lûs dai oms;
e la lûs e fâs lûs tal scûr
ma il scûr nol à rivât a cjapâle.

E jere la lûs vere,
che i fâs lûs a ogni om,
chê ch'e vignive tal mont.
Al jere tal mont
e il mont al è stât fat midiant di lui
e il mont no lu à recognossût.
Al è vignût in cjase sô
e i siei no lu an acetât.
Però a di chei che lu an acetât
ur à dât il podê di deventâ fîs di Diu,
a di chei ch'a crodin tal so non,
che no par vie di sanc
ni par volontât di cjar
ni par volontât di om
ma di Diu a son stâts gjenerâts.

E il Verbo si è fat cjar
e al è vignût a stâ framieç di nô
e nô o vin viodude la sô glorie,
glorie come di unigenit dal Pari
plen di gracie e di veretât.

Peraule dal Signôr.

PIFANIE DAL SIGNÔR PASCHE TAFANIE

PRIME LETURE

La glorie dal Signôr e lûs sore di te.

Dal libri dal profete Isaie

60,1-6

Je ve sù, vistissiti di lûs, parcè che e rive la tô lûs,
e la glorie dal Signôr e lûs sore di te!
Parcè che ve, la gnot e cuvierç la tiere
e il scûr al invuluce i popui,
ma sore di te al lûs il Signôr
e la sô glorie e comparîs sore di te.
I forescj a laran indenant cu la tô lûs,
e i rês cul to sfandôr che si alce.

Alce i vôi dulintor e cjale:
si son dâts dongje ducj, a vegnin di te,
i tiei fîs a vegnin di lontan,
e lis tôs fiis a son puartadis tal braç!
In chê volte tu viodarâs e tu sarâs sfandorose,
il to cûr al sbalçarà e si slargjarà,
parcè che lis ricjecis dal mâr s'ingrumaran li di te,
e ti rivarà due la robe dai forescj.
Une sdrume di camêi ti sumierzará,

dromedaris di Madijan e di Efe;
di Sabe a vegnин ducj,
puartant aur e incens,
cjantant lis lauts dal Signôr.

Peraule di Diu.

SALM RESPONSORIÂL

Dal Salm 71

R. Ti adoraran, Signôr, ducj i popui de tiere.

Diu, dai al re i tiei ordins,
al fi dal re la tô justizie.
Ch'al rezi il to popul cun justizie,
cun onestât i tiei puars. R.

Ch'e florissi tai siei dîs la justizie
e pâs in bondance,
fintremai che no si distudarà la lune.
Che si slargji il so ream di un mâr a di chel altri,
dal flum fint ai confins de tiere. R.

I rês di Tarsis e lis isulis
che i ufrissin i lôr regâi;
i rês di Sabe e di Sebe
che i puartin lis lôr tassis.
Che si plein ducj i rês denant di lui,
che ducj i forescj lu servissin. R.

Lui al liberarà il puar ch'al clame jutori,
il biât che nol à nissun che lu jude.
Al varà remission dal debul e dal puar
e al puartarà a salvament la vite dai biâts. R.

SECONDE LETURE

Ducj i popui a son clamâts, in Crist Gjesù, a partecipâ de stesse ereditât.

De letare di san Pauli apuestul ai Efesins

3,2-3,5-6

Fradis, o vês di sigûr sintût a fevelâ dal ministeri di gracie che Diu mi à dât in consegne pal vuestri ben,
come che par rivelazion mi è stât palesât il misteri.

Tes gjenerazions passadis, chest misteri nol jere stât palesât ai oms come che cumò al è stât palesât
midiant dal Spirt ai siei sants apuestui e profetis: che i paians a son stâts ametûts a la stesse ereditât, a son
parts dal stes cuarp e in dirit di partecipâ a la stesse promesse in Crist Gjesù midiant dal vanzeli.

Peraule di Diu.

SECUENCE

FESTA CHRISTI

La cristianitât interie ch'e celebri lis fiestis di Crist,
ornadis di melodiis straordenariis e veneradis di ducj i popui,
parcè che al è rivât chel che al à dut tes sôs mans
e al à clamât dongje i popui.

A pene che Crist al è nassût,
i magjos a an viodude une stele sflandorose.
Pensant che la glorie di un segnâl tant grant no fos cence une reson,

a partissin puartantsi daûr i regâi e ju ufrissin al frut,
che la stele e à proclamât re dal cîl.

Passâts denant de sente indorade di un princip prepotent,
a domandin seneôs là ch'e je la trasêf di Crist.

Di li la rabie infogade dal crudêl Erode.

Invidiôs dal re a pene nassût,
al da ordin di sassinâ cuntune spade che no perdone
ducj i frutins di Betlem.

O Crist, cetant grandis ch'a son lis schiriis dal Pari!
Zovin consacrât pes vueris plui grandis, tu predicjis ai popui
e za di frut tu ju tiris dongje inte lôr puaretât.

Tal trentesim an che si jere fat om,
Diu si è sbassât sot lis mans dal so grant servidôr,
consacrant cussì chel batisim che nus libere dai pecjâts.

Ve che il Spirt al ven sore di lui sot forme di colombe,
par onzilu di virtût cun santis sofladis,
ben content di restâ tal so cûr.

Si à sintude ancje la vôs sante dal Pari,
che e à dismienteadis lis peraulis di une volte:
«Mi pintis di vê creât l'om».

«Tu tu sêts propit gno Fi tant bon, che in te o ai metude la mê contentece:
vuê, Fi gno, ti ai gjenerât».
Scoltait, popui ducj, chest uestri mestri.

CJANT AL VANZELI

Cfr. Mt 2,2

R. Aleluia, aleluia.

O vin viodude la sô stele in orient
e o sin vignûts par adorâ il Signôr.

R. Aleluia.

VANZELI

O sin vignûts dal orient par adorâ il re.

Dal vanzeli seont Matieu

2,1-12

Dopo che Gjesù al jere nassût a Betlem in Gjudee, sot dal re Erode, ve che a rivarin a Gjerusalem dal orient magjos e a domandarin: «Dulà esal il re dai gjudeos a pene nassût? Parcè che o vin viodude la sô stele in orient e o sin vignûts par adorâ». Sintint une tâl, il re Erode al restâ scaturît e cun lui dute Gjerusalem. Alore al clamâ dongje ducj i sorestanti dai predis e i scrituriscj dal popul e ur domandâ: «Dulà varessial di nassi il Messie?». I rispuinderin: «A Betlem di Gjudee. Cussì di fat al è stât scrit midiant dal profete: “E tu, Betlem, tiere di Gjude no tu sêts propit il plui piçul di ducj i paîs di Gjude. Di te al saltarà fûr un sorestant ch'al passarà il gno popul, Israel”».

Alore Erode, al clamâ di scuindon i magjos e si informâ sul temp precîs che ur jere comparide la stele; po ju mandâ a Betlem disint: «Lait, cirît cun precision il frut; a pene che lu cjatais, fasêtmal savê ancje a mi, ch'o puedi lâ a adorâ».

Lôr, sintudis lis racomandazions dal re, si meterin in viaç. E ve: la stele, ch'a vegn viodude in orient, e leve denant di lôr fin che no si fermâ sul lûc là ch'al jere il frut. Viodint la stele, si jemplarin di une gjonde straordenarie. Jentrâts in cjase, a vioderin il frut cun Marie sô mari e si butarin denant di lui

adorantlu. Alore a vierzerin lis lôr arcjis e i ufririn in regâl aur, incens e mire. Po dopo, visâts in sium di no tornâ a passâ par li di Erode, a tornarin par un'altre strade tal lôr paîs.

Peraule dal Signôr.

Domenie dopo de Pifanie

BATISIM DAL SIGNÔR

PRIME LETURE

Ve il gno servidôr, che la mî anime si console in lui.

Dal libri dal profete Isaie

42,1-4.6-7

Cussì al dîs il Signôr:

«Ve il gno servidôr, che jo lu ten sù,
il gno elet, che la mî anime si console in lui.
O ai metût il gno spirt parsore di lui;
lui ur puartarà il dirit ai forescj.
Nol berlarà, nol alçará l'intono,
nol fasarà sintî pes placis la sô vôs.
Nol crevarà la cjane rote,
e nol distudarà il lusorut ch'al sta par murî;
al proclamarà il dirit cun fedeltât.
Nol larà denantdaûr e nol colarà abâs
fin che nol varà plantât il dirit su la tiere,
e lis isulis a bramaran il so insegnament.

«Jo, il Signôr, ti ai clamât te justizie
e ti ai cjapât pe man,
ti ai dât dongje e ti ai metût
aleance di popul e lûs dai forescj,
par che tu ur vierzis i vîoi ai vuarps
e che tu fasis saltâ fûr de preson i presonîrs,
e de lôr presonie chei ch'a vivin tal scûr».

Peraule di Diu.

SALM RESPONSORIÂL

Dal Salm 28

R. Glorie e laut al to non, Signôr.

Dait al Signôr, fîs di Diu,
dait al Signôr glorie e potence,
dait la glorie dal so non al Signôr,
denant dal Signôr in zenoglon butaitsi,
cuant che al comparis vistût di santitât. **R.**

Vôs dal Signôr parsore des aghis,
il Signôr parsore de inmensitât des aghis.
Vôs dal Signôr plene di fuarce,
vôs dal Signôr di maiestât incolme! **R.**

Al à tonât il Diu de glorie,
e «Glorie!» tal so templi ognidun al berle.
Il Signôr si è sentât parsore des grandis aghis,
si è sentât il Signôr come re par simpri. **R.**

SECONDE LETURE

Diu al à onzût di Spirtu Sant Gjesù di Nazaret.

Dai Ats dai Apuestui

10,34-38

Alore Pieri al cjapà la peraule e al disè: «Mi stoi propit sancirant che il Signôr nol fâs preferencis cun nissun e che in ogni part di mont al à agrât chel che lu tem e al pratiche la justizie.

Lui ur à mandade la sô peraule ai fîs di Israel, puartantjur la buine gnoove de pâs midiant di Gjesù Crist. Al è lui il Signôr di ducj.

O savês ce ch'al è sucedût par dute la Gjudee, scomençant de Galilee, daspò dal batisim predicjât di Zuan, cemût che Diu al à onzût di Spirtu Sant e di virtût Gjesù di Nazaret, ch'al è passât fasint dal ben e vuarint ducj chei ch'a jerin paronâts dal diaul, par vie che Diu al jere cun lui».

Peraule di Diu.

CJANT AL VANZELI

Cfr. Mc 9,7

R. Aleluia, aleluia.

Si son spalancâts i cîi e la vôs dal Pari e à dit:
«Chel chi al è gno Fi il plui cjâr: scoltaitlu!».

R. Aleluia.

VANZELI

A pene batiât, Gjesù al viodè il Spirt di Diu a vignî sore di lui.

Dal vanzeli seont Matieu

3,13-17

Alore Gjesù de Galilee al capitâ tal Gjordan par fâsi batiâ di Zuan.

Ma Zuan al voleve impedîjal disint: «O soi jo che o ai dibisugne di jessi batiât di te e tu invezit tu vegnis di me?». Ma Gjesù i disè: «Lasse par cumò, parcè che al è ben ch'o fasìn dut ce ch'al è just».

Alore al acetâ.

A pene jentrât ta l'aghe, Gjesù al tornà a saltâ fûr. E ve che si vierzerin i cîi parsore di lui e al viodè il Spirt di Diu a dismontâ jù come une colombe e a vignî sore di lui. E ve: e rivà dal cîl une vôs ch'e diseve: «Chel chi al è gno Fi il preferît, là che jo o ai metude dute la mî contentece».

Peraule dal Signôr.

Cuant che la Pifanie e ven celebraide la domenie 7 o 8 di zenâr e la fieste dal Batisim dal Signôr il lunis dopo, prime dal Vanzeli si fâs une leture sole.

Pes domeniis dopo dal Batisim dal Signôr fint a la Coresime, si va al vol. I/2, an A, dal Timp Vie pal an.

AN A

TIMP DI CORESIME

MIERCUS DE CINISE

PRIME LETURE

Sbregait i vuestris cûrs, no i vuestris vistîts.

Dal libri dal profete Gjoel

2,12-18

«**Cumò** alore – sentence dal Signôr –

tornait di me cun dut il cûr,

zunant, vaint e fasint corot».

Sbregait il vuestri cûr, no i vuestris vistîts

e tornait dal Signôr, vuestri Diu!
Lui al à dûl e al è di boncûr,
al stente a inrabiâsi e al è splendit tal perdonâ,
e si ricrôt dal mâl.
Cuissà? Magari al podarès gambiâ idee
e lassâsi daûr la benedizion:
ufierte e libagjon
pal Signôr vuestri Diu!

Sunait la trombe in Sion,
ordenait un dizun seont lis regulis,
clamait a semblee,
dait dongje il popul,
fasêt une cunvigne sante!
Metêt adun i anzians,
clamait dongje i fruts,
ancje chei ch'a tetin.
Il nuviç ch'al salti fûr de sô cjamare
e la nuvice dal so jet nuviçâl!
Fra la jentrade e l'altâr
ch'a vain i predis,
i servidôrs dal Signôr!
Ch'a disin:
«Vê dûl, Signôr, dal to popul!
No sta lassâ ch'a svergognin la tô ereditât,
che le sbelein ducj i forescj.
Parcè mo si varessial di dî framieç dai forescj:
Dulà esal po il lôr Diu?».

Il Signôr al è gjelôs de sô tierie
e i perdone al so popul.

Peraule di Diu.

SALM RESPONSORIÂL

Dal Salm 50

R. Vê dûl di nô, Signôr: o vin pecjât.

Vê dûl di me, o Diu, parcè che tu sês bon,
e pal to grant bonvolê pare jù il gno pecjât;
lavimi di dutis lis mês colpis,
smondeimi dal gno pecjât. R.

Jo o cognòs la mês colpe,
il gno pecjât lu ai simpri denant dai vôi.
Cuintri di te, dome cuintri di te o ai pecjât,
o ai fat ce ch'al jere mâl pai tiei vôi. R.

Cree dentri di me un cûr mont, o Diu,
torne a metimi intor un spirit che nol mole.
No sta parâmi lontan dai tiei vôi,
no sta lassâmi cence de ô sante soflade. R.

Tornimi la gjonde de ô salvece,
un spirit ben disponût che mi sostenti.
La mês lenghe ch'e laudi la ô justizie.
Signôr, vierç tu i miei lavris,
e la mês bocje ch'e cjanti la ô laude. R.

SECONDE LETURE

Riconciliaitsi cun Diu... Velo chi il moment just.

De seconde letare di san Pauli apuestul ai Corints

5,20-6,2

Fradis, siceduncje nô o sin i representants di Crist e al è come se Diu al racomandâs midiant di nô. Us suplichin in non di Crist: riconciliaitsi cun Diu! Chel che nol à cognossût pecjât, lui lu à fat deventâ pecjât par nô, par che nô o podessin deventâ midiant di lui justizie di Diu.

E stant ch'o lavorìn cun lui, us racomandîn di no ricevi par dibant la gracie di Diu. Di fat al dîs: «Tal moment just ti ai esaudît e te dì de salvece ti ai judât».

Velo chi cumò il moment just, vele chi cumò la dì de salvece!

Peraule di Diu.

CJANT AL VANZELI

Cfr. Sal 94,8

R. Laut a ti, o Crist, re di eterne glorie!

Vuê no stait a inrochîsi tal vuestri cûr,
ma scoltait la vôs dal Signôr.

R. Laut a ti, o Crist, re di eterne glorie!

VANZELI

Il Pari to, ch'al viôt tal segret, ti ricompensarà.

Dal vanzeli seont Matieu

6,1-6,16-18

In chê volte, Gjesù al disè ai siei dissepui: «Stait atents di no praticâ la vuestre justizie denant dai oms par jessi cjalâts di lôr; senò no varês ricompense de bande dal Pari vuestri ch'al è tai cîi.

Alore, cuant che tu fasis la caritât, no sta tacâ a sunâ la trombe denant di te, come ch'a fasin i fals tes sinagoghis e tes stradis, par jessi puartâts in alt dai oms. Us al dîs in veretât: a an za vude la lôr ricompense. Ma cuant che tu sêts daûr a fâ la caritât, che no sepi la tô çampe ce ch'e fâs la tô gjestre, di mût che la ô caritât e resti tal segret; e il Pari to, ch'al viôt ancje tal segret, ti ricompensarà.

Cuant che o preais, no vêts di jessi come i fals, ch'a bramin dome di preâ stant in pîts tes sinagoghis e tai cjantons des placis, par fâsi viodi dai oms. Us al dîs in veretât: a an za vude la lôr ricompense. Tu invezit, cuant che tu âs voe di preâ, jentre te ô cjamarute e, sierade la puarte, pree il Pari to ch'al sta tal segret; e il Pari to, ch'al viôt tal segret, ti ricompensarà.

Cuant che o zunais, no stait a fâ une muse avilide, come i fals, che si sfigurin la muse par fâsi viodi a zunâ dai oms. Us al dîs in veretât: a an za vude la lôr ricompense.

Invezit tu, cuant che tu zunis, onziti il cjâf e laviti la muse par no fâti viodi dai oms che tu stâs zunant, ma dome dal Pari to ch'al è tal segret; e il Pari to, ch'al viôt tal segret, ti ricompensarà».

Peraule dal Signôr.

I DOMENIE DI CORESIME

PRIME LETURE

La creazion dai progenitôrs e il lôr pecjât.

Dal libri de Gjenesi

2,7-9; 3,1-7

Alore il Signôr Diu al fasè il stamp dal om cu l'arzile, i soflà tes busis dal nâs une soflade di vite e l'om al deventâ une creature vivent.

Po dopo il Signôr Diu al plantâ un zardin tal Eden, de bande di soreli jevât, e li al metè l'om ch'al veve fat. Il Signôr Diu al fasè butâ fûr de tiere ogn sorte di arbui, ch'a jerin un spetacul dome a viodiju e bogns di mangjâ, e l'arbul de vite tal mieç dal zardin, e l'arbul de cognossince dal ben e dal mâl.

Il madrac al jere il plui galiot di dutis lis bestiis de tiere che il Signôr Diu al veve fatis. I disè a la femine: «Sichè Diu us à dit: No podêts mangjâ di ducj i arbui dal zardin?». I rispuindè la femine al madrac: «O podin mangjâ lis pomis dai arbui dal zardin. Dome che de pome dal arbul ch'al è tal mieç dal zardin, Diu al à dite: No vês ni di mangjânt ni di tocjânt, senò o murarê». I disè il madrac a la femine: «Çavareaiso? No je vere ch'o murarê! Ma Diu al sa che la dì che vualtris int mangjarê, si vierzaran i vuestris vôi e o sarê come i dius, ch'a cognossin il ben e il mâl».

La femine e viodè che l'arbul al jere bon di mangjâ e biel di cjalâlu e ch'al jere, chest arbul, golôs cence fin par rivâ a cognossi dut. E çumà une pome e le mangjâ. E int puartà ancje al so om, ch'al jere cun jê, e ancje lui int mangjâ. Alore si vierzerin i vôi a ducj i doi e si inacuarzerin che a jerin crots.

Peraule di Diu.

SALM RESPONSORIÂL

Dal Salm 50

R. Vê dûl di nô, Signôr: o vin pecjât.

Vê dûl di me, o Diu, parcè che tu sêts bon,
e pal to grant bonvolê pare jù il gno pecjât;
lavimi di dutis lis mês colpis,
smondeimi dal gno pecjât. R.

Jo o cognòs la mêm colpe,
il gno pecjât lu ai simpri denant dai vôi.
Cuintri di te, dome cuintri di te o ai pecjât,
o ai fat ce ch'al jere mâl pai tiei vôi. R.

Cree dentri di me un cûr mont, o Diu,
torne a metimi intor un spirit che nol mole.
No sta parâmi lontan dai tiei vôi,
no sta lassâmi cence de tô sante soflade. R.

Tornimi la gjonde de ô salvece,
un spirit ben disponût che mi sostenti.
La mêm lenghe ch'e laudi la ô justizie.
Signôr, vierç tu i miei lavris,
e la mêm bocje ch'e cjanti la ô laude. R.

SECONDE LETURE ★

Dulà che grant al è il pecjât, plui grande inmò e je la gracie.

De letare di san Pauli apuestul ai Romans

5,12-19

Fradis, come che midiant di un om sôl il pecjât al è jentrât tal mont e cul pecjât la muart, cussì ancje la muart e je rivade a ducj i oms, parcè che ducj a an pecjât. Di fat fintremai a la leç il pecjât al jere tal mont, ma un pecjât nol ven metût in cont se no je la leç. Epûr la muart e à fat di parone espotiche, di Adam fint a Mosè, ancje sun chei che no vevin pecjât, par chê lôr colegance cu la trasgression di Adam, ch'al è figure di chel ch'al veve di vignî.

Ma il don de gracie nol è compagn dal fal. Di fat se pal fal di un sôl a son muarts in tancj, cetant miei il boncûr di Diu e il regâl dal boncûr di un om sôl, Gjesù Crist, si è stranfât sui tancj. E nol è nancje sucedût pal don de gracie come pal pecjât di un sôl: di fat il judizi ch'al partis di un sôl al va a finîle te condane; invezit il regâl de gracie al partis di un disordin di pecjâts par lâ a finîle te justificazion. Se duncje pal fal di un sôl la muart e à regnât par colpe di chel sôl, cetant miei chei ch'a cjapin la bondance dal boncûr e il don de justizie a regnaran te vite midiant dal sôl Gjesù Crist.

Sicheduncje, come midiant de colpe di un sôl la condane si è slargjade sun ducj i oms, cussì ancje pe justizie di un sôl si slargje sun ducj i oms la justificazion ch'e fâs vivi. Di fat come pe disubidience di un om sôl i tancj a son stâts metûts tal grum dai pecjadôrs, cussì midiant de ubidience di un sôl i tancj a saran metûts tal grum dai juscj.

Peraule di Diu.

Forme curte:

De letare di san Pauli apuestul ai Romans

5,12.17-19

Fradis, come che midiant di un om sôl il pecjât al è jentrât tal mont e cul pecjât la muart, cussì ancje la muart e je rivade a ducj i oms, parcè che ducj a an pecjât.

Se duncje pal fal di un sôl la muart e à regnât par colpe di chel sôl, cetant miei chei ch'a cjapin la bondance dal boncûr e il don de justizie a regnaran te vite midiant dal sôl Gjesù Crist.

Sicheduncje, come midiant de colpe di un sôl la condane si è slargjade sun ducj i oms, cussì ancje pe justizie di un sôl si slargje sun ducj i oms la justificazion ch'e fâs vivi. Di fat come pe disubidience di un om sôl i tancj a son stâts metûts tal grum dai pecjadôrs, cussì midiant de ubidience di un sôl i tancj a saran metûts tal grum dai juscj.

Peraule di Diu.

CJANT AL VANZELI

Cfr. Mt 4,4

R. Laut a ti, o Crist, re di eterne glorie!

L'om nol vivarà dome di pan,
ma di ogni peraule ch'e ven fûr de bocje di Diu.

R. Laut a ti, o Crist, re di eterne glorie!

VANZELI

Gjesù al zune par corante dîs intal desert e po al è tentât.

Dal vanzeli seont Matieu

4,1-11

In chê volte, Gjesù al fo menât dal Spirt intal desert par jessi tentât dal diaul. E, dopo di vê zunât par corante dîs e corante gnots, i vignì fan. I lè dongje il tentadôr e i disè: «Se tu sêss Fi di Diu, dîs che chestis pieris a deventin pan». Ma lui i rispuindè: «Al è scrit: “L'om nol vivarà dome di pan, ma di ogni peraule ch'e ven fûr de bocje di Diu”».

Alore il diaul lu menà cun sè te citât sante, lu poià su la spice dal templi e i disè: «Se tu sêss Fi di Diu, butiti jù. Di fat al è scrit: “Par te ur darà ordin ai siei agnui che ti tegnin sù cui lôr braçs, par che il to pît nol sbati in cualchi clap”». I rispuindè Gjesù: «Al è ancje scrit: “No sta tentâ il Signôr to Diu”».

Di gnûf il diaul lu menà cun sè suntune mont une vore alte e i mostrà ducj i reams dal mont cun dut il lôr sflandôr. E i disè: «Dutis chestis robis tes darai a ti se, butantti in zenoglon, tu mi adorarâs». Alore Gjesù i disè: «Va vie di chi, satane! Al è scrit: “Tu adorarâs il Signôr to Diu e tu ti inzenoglarâs dome denant di lui”».

Alore il diaul lu lassà. E ve che i agnui i lerin dongje par servîlu.

Peraule dal Signôr.

II DOMENIE DI CORESIME

PRIME LETURE

Clamade di Abram, pari dal popul di Diu.

Dal libri de Gjenesi

12,1-4

Il Signôr i disè a Abram:

«Lasse la tô tiere, la tô parintât
e la cjase di to pari
par lâ te tiere che ti mostrarai.
Jo o fasarai di te un grant popul,
ti benedissarai,
o fasarai deventâ une vore grant il to non
e tu tu sarâs une benedizion.
O benedissarai chei che ti benedissaran
e o maludissarai chei che ti maludissaran.
Midian di te a saran benedîts
ducj i popui de tiere».

Alore Abram al partì come che i veve dit il Signôr.

Peraule di Diu.

SALM RESPONSORIÂL

Dal Salm 32

R. Danus, Signôr, la tô gracie: in te o sperin.

La peraule dal Signôr e je juste
e je fedele in ogni sô vore.
Lui al ten pe onestât e pe dretece;
dal boncûr dal Signôr e je incolme la tiere. **R.**

Ve, il voli dal Signôr si poe sun chei che lu rispietin,
sun chei che tal so boncûr a sperin,
par sfrancjâ de muart lis lôr vitis,
par tignîju in vite in temp di miserie. **R.**

Viers dal Signôr e brame la nestre anime:
al è lui nestri scût e nestri jutori.
Ch'al sedi sore di nô, Signôr, il to boncûr,
parcè che dome sun te o stin fidâts. **R.**

SECONDE LETURE

Diu nus clame e nus fâs lûs.

De seconde letare di san Pauli apuestul a Timoteo

1,8-10

Benedet, no sta vergognâti alore di testemoneâ nestri Signôr e ancje me ch'o soi in preson par lui, ma patîs invezit cun me pal vanzeli confidant te fuarce di Diu. Di fat al è lui che nus à salvâts e nus à clamâts cuntune clamade sante, no in virtût des nestris oparis ma seont il so progjet e la sô gracie, che nus è stade dade in Crist prin dai temps de eternitât, ma ch'e je stade pandude cumò midiant de aparizion dal salvadôr nestri Gjesù Crist. Lui al à disfate la muart e al à fate lusî la vite e l'immortalitât midiant dal vanzeli.

Peraule di Diu.

CJANT AL VANZELI

Cfr. Mc 9,7

R. Laut e onôr a ti, Signôr Gjesù!

Dal nûl sflandorôs si sinti la vôs dal Pari:
«Chel chi al è gno Fi il plui cjâr: scoltaitlu!»

R. Laut e onôr a ti, Signôr Gjesù!

VANZELI

La sô muse e lusì tant che il soreli.

Dal vanzeli seont Matieu

17,1-9

In chê volte, Gjesù al cijolè cun sè Pieri, Jacum e Zuan so fradi e ju menà fûr di man, suntune mont alte. E al comparì denant di lôr trasfigurât: la sô muse e deventâ lusorose come il soreli e lis viestis cjandidis come la lûs. E ve, ur comparirin Mosè e Elie tal at di fevelâ cun lui.

Alore Pieri al cijapà la peraule e al disè: «Signôr, par nô al è biel stâ culì; se tu vuelis, o fasarai chi trê tendis, une par te, une par Mosè e une par Elie». Biel ch'al jere ancjemò daûr a fevelâ, ve che un nûl lusint ju invuluçà. E ve, dal nûl si sintì une vôs ch'e diseve: «Chel chi al è gno Fi il preferît, là che jo o ai metude dute la mè contentece; scoltaitlu».

Sintint cussì, i dissepui a colarin cu la muse par tiere, spaventâts a muart. Ma Gjesù si svicinà e ju tocjà disint: «Jevait sù; no stait a vê pôre!». E lôr, alçant i vòi, no vioderin nissun, dome Gjesù.

Intant ch'a dismontavin de mont, Gjesù ur ordenà: «No stait a fâ peraule cun nissun di ce ch'o vêts viodût, fin che il Fi dal om nol sarà resurût de muart».

Peraule dal Signôr.

III DOMENIE DI CORESIME

PRIME LETURE

Danus aghe di bevi.

Dal libri dal Esodo

17,3-7

In chei dîs, il popul al pative l'arsetât e al bruntulà cuintri di Mosè: «Parcè mo nus âstu fats saltâ fûr dal Egjît? Par fânus murî di sêt, me, i miei fîs e i miei nemâi?».

Mosè al berlâ viers dal Signôr e i disè: «Ce aio di fâ par cheste int? Nol va vie trop che mi coparan a clapadis». Dissal il Signôr a Mosè: «Metiti denant dal popul e cijol cun te un pôcs di anzians di Israel; cjape in man il to baston, chel che tu âs batût il flum, e va. Jo o sarai denant di te là jù, su la crete, sul Oreb. Tu batarâs un coup su la crete e l'aghe e spissularà fûr e la int e podarà distudâ la sêt».

Mosè al fasè propit cussì sot i vòi dai anzians di Israel. I metè non al lûc Masse e Meribe, parcè che i israelits a implantarin un cavîl e parcè che a tirarin a ciment il Signôr disint: «Il Signôr esal de nestre bande o no?».

Peraule di Diu.

SALM RESPONSORIÂL

Dal Salm 94

R. Fâs che o scoltìn, Signôr, la tô vôs.

Vignît, batîn lis mans al Signôr,
fasìn fieste a la crete che nus pare;
presentînsi denant di lui ringraziântlu,
fasìn fieste cun cjantis di ligrie. **R.**

Vignît, butînsi a schene plete
denant dal Signôr che nus à créâts,
parcè che al è lui il nestri Diu,
e nô, il popul che lui al passone,
il trop de sô malghe. **R.**

Joi, se vuê la sô vôs o scoltassis:
«No stait a inrochîsi tal vuestri cûr come a Meribe,

come tal desert te dì di Masse,
là che mi an tirât a ciment i vuestris paris,
a an volût provâmi,
ancje se a vevin viodus lis mês voris». **R.**

SECONDE LETURE

L'amôr di Diu al è stât strucjât tai nestris cûrs in fuarce dal Spirtu Sant che nus è stât dât.

De letare di san Pauli apuestul ai Romans

5,1-2.5-8

Fradis, justificâts pe fede, o sin in pâs cun Diu midiant dal nestri Signôr Gjesù Crist. Midiant di lui o vin vude ancje la jentrade, pe fede, in cheste gracie che si ciatin e si vantin te sperance de glorie di Diu.

E la sperance no lasse malapaiâts, pal fat che l'amôr di Diu al è stât strucjât tai nestris cûrs in fuarce dal Spirtu Sant che nus è stât dât.

Di fat, cuant che nô o jerin inmò pecjadôrs, Crist, tal timp distinât, al è muart pai triscj. E je intrigade ciatâ fûr un ch'al sedi disponût a murî par un just; salacôr un al varès la fuarce di murî par un galantom. Ma Diu nus da la prove dal so amôr par nô propit tal fat che, cuant che nô o jerin ancjemò pecjadôrs, Crist al è muart par nô.

Peraule di Diu.

CJANT AL VANZELI

Cfr. Zn 4,42 e 15

R. Laut a ti, o Crist, re di eterne glorie!

Signôr, tu sêts propit il salvadôr dal mont:
dami cheste aghe, par che no vedi plui sêt.

R. Laut a ti, o Crist, re di eterne glorie!

VANZELI ★

Risultive di aghe ch'e spissule pe vite eterne.

Dal vanzeli seont Zuan

4,5-42

In chê volte, Gjesù al rive tune citât de Samarie che i disevin Sicar, dongje dal cjamp che Jacop i veve dât a so fi Josef. Al jere li il poç di Jacop. Gjesù, strac come ch'al jere pal viaç, si jere sentât dongje dal poç; si jere tor misdì. E rivà a urî aghe une femine de Samarie. I dîs Gjesù: «Dami di bevi». Di fat i dissepui a jerin lâts in citât a cijolisi alc di mangjâ. I dîs la femine samaritane: «Cemût mai, tu che tu sêts un gjudeo, mi domandistu di bevi a mi, ch'o soi une femine samaritane?». Che di fat i gjudeos a son in rotis cui samaritans. I rispuindè Gjesù: «Se tu cognossessis il don di Diu e cui ch'al è chel che ti dîs: "Dami di bevi", tu jal varessis domandât tu e lui ti varès dade aghe vive». I dîs la femine: «Siôr, no tu âs nancje un seglot e il poç al è font. D'indulà cijolistu alore l'aghe vive? Sêstu forsit plui grant dal nestri pari Jacop, che nus à dât il poç e ind à bevût lui e i siei fîs e i siei nemâi?».

I rispuindè Gjesù: «Chel ch'al bêf di cheste aghe, al varà indaûr sêt. Invezit chel ch'al bêf l'aghe che i darai jo, nol varà plui sêt; ma l'aghe che i darai jo e deventarà in lui une risultive di aghe ch'e spissule pe vite eterne». I dîs la femine: «Siôr, dami cheste aghe, par che no vedi plui sêt e no mi tocji di vignî culì a urî». I dîs: «Va a clamâ il to om e po torné chi». I rispuindè la femine: «No ai om». I dîs Gjesù: «Tu âs dit just: "No ai om", parcè che tu âs vût cinc oms e chel che tu âs cumò nol è il to om. Sun chest, tu âs dite la veretât».

I dîs la femine: «Signôr, o viôt che tu sêts un profete. I nestris vons a an adorât sun cheste mont e vualtris o disêts che al è a Gjerusalem il lûc là che si à di adorâ». I dîs Gjesù: «Crodimi, femine, che e ven un'ore che no adorarêts il Pari ni sun cheste mont ni a Gjerusalem. Vualtris o adorais ce che no cognossêts; nô o adorîn ce ch'o cognossîn, parcè che la salvece e ven dai gjudeos. Ma e ven un'ore, anzit e je cumò, che i vêrs adoradôrs a adoraran il Pari in Spirt e veretât; e di fat il Pari al va a cirî int cussì che lu adori. Diu al

è Spirt e chei che lu adorin, a an di adorâlu in Spirt e veretât». I dîs la femine: «O sai ch' al à di vignî un Messie (ch' al vûl dî “Crist”). Cuant che lui al vignarà, nus contará dut». I dîs Gjesù: «O soi jo, chel che ti sta fevelant».

In chel a rivarin i siei dissepui, e a restarin a viodilu a fevelâ cuntune femine. Però nissun no i disè: «Ce vuelistu di jê?», o ben: «Parcè fevelistu cun jê?». La femine intant e lassà li la sô bocalete e e tornà in citât, e i dîs a la int: «Vignít a viodi un om che mi à contât dut ce ch'o ai cumbinât. Che nol ves di jessi propit lui il Crist?». A saltarin fûr de citât e a lerin li di lui.

Tal fratimp, i siei dissepui lu preavin disint: «Rabì, mangje alc!». Ma lui ur disè: «Jo o ai une mangjative che vualtris no le cognossê». E i dissepui si cisicavin fra di lôr: «Che i vedi puartât di mangjâ cualchidun?». Ur dîs Gjesù: «La mè mangjative e je tal fâ la volontât di chel che mi à mandât e di puartâ al colm la sô vore. No disêso anje vualtris: Ancjemò cuatri mês e e ven l'ore di seselâ? Ve, us dîs: alçait i vuestris vôi e cjalait i cjamps: a son palomps par seselâ. Il seseladôr al cjape la sô pae e al ingrume prodot pe vite eterne, par che il semenadôr al gjoldi insieme cul seseladôr. Di fat in chest câs al è vêr il proverbi: Chel ch' al semene al è diferent di chel ch' al sesele. Jo us ai mandâts a seselâ ce che no vês fadiât; altris a an fadiât e vualtris o vês cjapât il lôr puest te fadie».

Une vore di samaritans di chê citât a croderin in lui pe peraule de femine, che e veve confermat: «Mi à dit dut ce ch'o ai cumbinât». E cuant che i samaritans a rivarin li di lui, lu preavin di restâ cun lôr; e al restâ doi dîs. E a forin cetant di plui chei che a croderin midiant de sô peraule. I disevin a la femine: «No crodîn plui par vie dai tiei discors. Di fat o vin sintût nô in persone e o savìn che lui al è propit il salvadôr dal mont».

Peraule dal Signôr.

Forme curte:

Dal vanzeli seont Zuan

4,5-15.19-26.28-29.39.40-42

In chê volte, Gjesù al rive tune citât de Samarie che i disevin Sicar, dongje dal cijamp che Jacop i veve dât a so fi Josef. Al jere li il poç di Jacop. Gjesù, strac come ch' al jere pal viaç, si jere sentât dongje dal poç; si jere tor misdì. E rivà a urî aghe une femine de Samarie. I dîs Gjesù: «Dami di bevi». Di fat i dissepui a jerin lâts in citât a cijolisi alc di mangjâ. I dîs la femine samaritane: «Cemût mai, tu che tu sêts un gjudeo, mi domandistu di bevi a mi, ch'o soi une femine samaritane?». Che di fat i gjudeos a son in rotis cui samaritans. I rispuindè Gjesù: «Se tu cognossessis il don di Diu e cui ch' al è chel che ti dîs: “Dami di bevi”, tu jal varessis domandât tu e lui ti varès dade aghe vive». I dîs la femine: «Siôr, no tu âs nancje un seglot e il poç al è font. D'indulà cijolistu alore l'aghe vive? Sêstu forsit plui grant dal nestri pari Jacop, che nus à dât il poç e ind à bevût lui e i siei fîs e i siei nemâi?».

I rispuindè Gjesù: «Chel ch' al bêf di cheste aghe, al varà indaûr sêt. Invezit chel ch' al bêf l'aghe che i darai jo, nol varà plui sêt; ma l'aghe che i darai jo e deventarà in lui une risultate di aghe ch'e spissule pe vite eterne». I dîs la femine: «Siôr, dami cheste aghe, par che no vedi plui sêt e no mi tocji di vignî culì a urî. O viôt che tu sêts un profete. I nestris vons a an adorât sun cheste mont e vualtris o disêts che al è a Gjerusalem il lûc là che si à di adorâ». I dîs Gjesù: «Crodimi, femine, che e ven un'ore che no adorarêts il Pari ni sun cheste mont ni a Gjerusalem. Vualtris o adorais ce che no cognossê; nô o adorîn ce ch'o cognossin, parcè che la salvece e ven dai gjudeos. Ma e ven un'ore, anzit e je cumò, che i vêrs adoradôrs a adoraran il Pari in Spirt e veretât; e di fat il Pari al va a cirî int cussì che lu adori. Diu al è Spirt e chei che lu adorin, a an di adorâlu in Spirt e veretât».

I dîs la femine: «O sai ch' al à di vignî un Messie (ch' al vûl dî “Crist”). Cuant che lui al vignarà, nus contará dut». I dîs Gjesù: «O soi jo, chel che ti sta fevelant».

La femine intant e lassà li la sô bocalete e e tornà in citât, e i dîs a la int: «Vignít a viodi un om che mi à contât dut ce ch'o ai cumbinât. Che nol ves di jessi propit lui il Crist?».

Une vore di samaritans di chê citât a croderin in lui pe peraule de femine. E cuant che i samaritans a rivarin li di lui, lu preavin di restâ cun lôr; e al restâ doi dîs. E a forin cetant di plui chei che a croderin

midian de sô peraule. I disevin a la femine: «No crodìn plui par vie dai tiei discors. Di fat o vin sintût nô in persone e o savìn che lui al è propit il salvadôr dal mont».

Peraule dal Signôr.

IV DOMENIE DI CORESIME

PRIME LETURE

David al è onzût re di Israel.

Dal prin libri di Samuel

16,1.4.6-7.10-13

In chei dîs, il Signôr i disè a Samuel: «Jemple di vueli il to cuar e va! Ti mandi di Jesse di Betlem, parcè che mi soi sielzût un re framieç dai siei fîs». Samuel al fasè ce che il Signôr i veve ordenât.

Cuant che a rivarin e che Samuel al lumà Eliab, dissal dentri di sè: «Sigûr che il Signôr al à denant di sè il so consacrât!». Ma il Signôr i disè a Samuel: «No sta lassâtiinceâ dal so aspiet ni parcè che al è un toc di om, che jo lu ai scartât. Jo no cjali ce ch' al cjale l'om, parcè che l'om al cjale l'aparince ma il Signôr al cjale il cûr».

Jesse al fasè passâ denant di Samuel i siei siet fîs, ma Samuel i disè a Jesse: «Il Signôr no 'nd à sielzût nissun di chescj chi». I domandà a Jesse: «No âstu nissun altri fi?» e chel altri i rispuindè: «Al sarès ancjemò il plui piçul, ch' al è a passon cu la mandrie». Alore Samuel i disè a Jesse: «Mandimal a clamâ; no si sentarîn in taule fintremai che nol è rivât ancje lui». Jesse lu mandà a clamâ: al jere rossit, cun doi vîi che ce, e tant ben fat che mai.

E il Signôr al disè: «Jeve sù e onzilu, ch' al è lui!». Samuel al cijolè il cuar dal vueli e lu onzè a preference dai siei fradis. Il spirt dal Signôr al plombâ parsore di David tacant d'in chê dì in ca.

Peraule di Diu.

SALM RESPONSORIÂL

Dal Salm 22

R. Il Signôr al è il gno pastôr: no mi mancjarà nuie.

Mi fâs polysâ là che i passons a sverdein,
mi mene là ch' a son aghis frescjis.
Al tire sù la mê vite, in gracie dal so non
mi mene par trois di justizie. **R.**

Ancje s'o ves di cjaminâ par une foranate scure,
di nissun mâl no varès pôre, parcè che tu mi sêts dongje;
il to baston e la tô vuiscje
a son lôr che mi parin. **R.**

Tu prontis denant di me une taulade
presince dai miei nemîs,
il gno cjâf tu âs onzût di vueli
e il gno bocâl al è plen ch' al stranfe. **R.**

Propit, bontât e boncûr mi compagnaran
ducj i dîs de mê vite,
te cjase dal Signôr
par une vore di agns o restarai. **R.**

SECONDE LETURE

Resurîs dai muarts e Crist al lusarà sore di te.

De letare di san Pauli apuestul ai Efesins

5,8-14

Fradis, o jeris scûr ma cumò o sêts lûs tal Signôr: compuartaitsi come fîs de lûs. La lûs e bute ogni sorte di bontât, di justizie e di veretât.

Sielzêt ce che i plâs a Diu. No stait a fâ leghe cu lis voris dal scûr, che no butin, ma anzit rifudaitlis, parcè che ce che lôr a cumbinin di scuindon al è di vergognâsi dome a contâlu; ma dut ce ch' al è condanât, al ven palesât de lûs. Di fat dut ce ch' al è palesât al è lûs. Par chel si dîs:

«Dismoviti, tu che tu duarmis,
resurîs dai muarts
e Crist al lusarà sore di te».

Peraule di Diu.

CJANT AL VANZELI

Cfr. Zn 8,12

R. Glorie a ti, o Crist, Verbo di Diu!

Jo o soi la lûs dal mont, al dîs il Signôr,
chel che al ven daûr di me al varà la lûs de vite.

R. Glorie a ti, o Crist, Verbo di Diu!

VANZELI ★

Al lè, si lavà e al tornà indaûr ch' al viodeve.

Dal vanzeli seont Zuan

9,1-41

In chê volte, Gjesù biel passant, al viodè un om ch' al jere nassût vuarp. I siei dissepui i domandarin: «Rabì, cui aial pecjât, lui o i siei gjenitôrs, ch' al è nassût vuarp?». Ur rispuindè Gjesù: «Nol à pecjât ni lui ni i siei gjenitôrs, ma par che si palesin in lui lis oparis di Diu. O vin di fâ lis oparis di chel che mi à mandât fin ch' al è dì. Po e ven la gnot, cuant che nissun nol pues plui operâ. Fintremai ch' o soi tal mont, o soi la lûs dal mont».

Al spudà par tiere e al fasè un piç di pantan cu la salive e al slargjà il pantan sui vòi di lui. E i disè: «Va laviti te vascje di Siloe» (ch' al vûl dî “mandât”). Lui al lè, si lavà, e al tornà indaûr ch' al viodeve. I vicins e chei che lu vevin viodût prime a cirî la caritât a disevin: «No esal chel ch' al jere sentât a cirî?». Altris a disevin: «Po no Lafè! Al è un che i semee». Lui però al diseve: «O soi propit jo!». I disevin alore: «Cemût mai che ti son vierzûts i vòi?». Lui ur rispuindè: «Un om, che i disin Gjesù, al à fat un piç di pantan e mal à slargjât sui vòi e mi à dit: “Va a Siloe e laviti”. Jo o soi lât, mi soi lavât e o ai tacât a viodi». I rispuinderin: «E lui dulà esal?». Ur dîs: «No sai».

Chel che prime al jere vuarp, lu menin dai fariseos. E jere sabide la dî che Gjesù al fasè il pantan e i vierzè i vòi. Ancje i fariseos lu interpelavin sul mût ch' al veve tornât a viodi. Ur disè: «Mi à metût pantan sui vòi, mi soi lavât e o viôt». Alore cualchi fariseo al diseve: «Chest om nol ven di Diu, parcè che nol rispiete la sabide». Altris però a disevin: «Cemût puedial un, s' al è pecjadôr, fâ spiêi di cheste sorte?». E a jerin dividûts fra di lôr. Alore a tornin a dîi al vuarp: «E tu, ce disistu di lui, pal fat che ti à vierzût i vòi?». Ur rispuindè: «Al è un profete».

Però i gjudeos no crodevin che lui al fos stât vuarp e al ves tornât a viodi, fin che no clamarin i gjenitôrs di chel ch' al veve tornât a viodi e ju interpelarin: «Chest chi esal propit vuestri fi, chel che vualtris o disêts ch' al jere nassût vuarp? E cemût mai che cumò al viôt?». Ur rispuinderin i siei gjenitôrs: «Nô o savìn che chel chi al è nestri fi e ch' al è nassût vuarp. Cemût mai che cumò al viôt, nô no lu savìn e nancje no savìn cui che i à vierzûts i vòi. Domandaitlu a lui, ch' al à la sô etât; al fevelarà lui sul so cont». I siei gjenitôrs a disevin cussì parcè che a vevin pôre dai gjudeos. Di fat i gjudeos si jerin za metûts d'acuardi che, se cualchidun lu ves ricognossût come Crist, lu varessin butât fûr de sinagoghe. Par chel i siei gjenitôrs a diserin: «Al à la sô etât. Domandaitlu a lui!».

Alore a clamarin pe seconde volte l'om ch' al jere stât vuarp e i diserin: «Da glorie a Diu! Nô o savìn che chest om al è un pecjadôr». Ur rispuindè: «S' al è un pecjadôr jo no lu sai. O sai dome une robe: o jeri vuarp e cumò o viôt». I diserin: «Ce ti aial fat? Cemût ti aial vierzûts i vòi?». Ur rispuindè: «Us al ai za

dit e no mi vêts scoltât. Parcè volêso sintîlu ancjemò une volte? Volêso forsit deventâ siei dissepui ancje vualtris?». Alore lu sofegarin di improperis e i diserin: «Tu sêts tu dissepul di chel li; nô o sin dissepui di Mosè. Nô o savìn che a Mosè i à fevelât Diu, ma chel chi no savìn dontri ch' al è». L'om ur rispuindè: «Al è propit chest il biel: che no savêts di dulà ch' al è, epûr mi à vierzûts i vòi. Nô o savìn che Diu nol scolte i pecjadôrs, ma se un al à religjon e al fâs la sô volontât, chel lu scolte. Di cuant che mont al è mont, no si à mai sintût a dî che un al vedi vierzûts i vòi di un nassût vuarp. Se chel om nol fos di Diu, nol varès rivât a fâ nuie». I rispuinderin: «Tu sêts nassût dut intîr tai pecjâts e tu pratindis di insegnâns a nô?». E lu pararin fûr.

Gjesù al sintì che lu vevin parât fûr e, incuinrantlu, i disè: «Crodistu tu tal Fi dal om?». I rispuindè: «Ma cui esal, Signôr, par ch'o crodi in lui?». I disè Gjesù: «Tu lu âs za viodût: al è chel ch' al fevele cun te». Al disè: «O crôt, Signôr», e si butà in zenoglon denant di lui.

Dissal alore Gjesù: «Jo o soi vignût in chest mont par fâ sentence: par che chei che no viodin a viodin e chei ch'a viodin a deventin vuarps». Un pôcs di fariseos ch'a jerin cun lui a sintirin chestis peraulis e i diserin: «Sino par câs vuarps ancje nô?». Gjesù ur disè: «S'o fossis vuarps, no varessis pecjât. Ma vualtris o disê: «Nô o viodin». E il vuestri pecjât al reste».

Peraule dal Signôr.

Forme curte:

Dal vanzeli seont Zuan

9,1.6-9,13-17,34-38

In chê volte, Gjesù biel passant, al viodè un om ch' al jere nassût vuarp. Al spudà par tiere e al fasè un piç di pantan cu la salive e al slargjà il pantan sui vòi di lui. E i disè: «Va laviti te vascje di Siloe» (ch' al vûl dî “mandât”). Lui al lè, si lavà, e al tornà indaûr ch' al viodeve. I vicins e chei che lu vevin viodût prime a cirî la caritât a disevin: «No esal chel ch' al jere sentât a cirî?». Altris a disevin: «Po no lafè! Al è un che i semee». Lui però al diseve: «O soi propit jo!».

Chel che prime al jere vuarp, lu menin dai fariseos. E jere sabide la dî che Gjesù al fasè il pantan e i vierzè i vòi. Ancje i fariseos lu interpelavin sul mût ch' al veve tornât a viodi. Ur disè: «Mi à metût pantan sui vòi, mi soi lavât e o viôt». Alore cualchi fariseo al diseve: «Chest om nol ven di Diu, parcè che nol rispiete la sabide». Altris però a disevin: «Cemût puedial un, s'al è pecjadôr, fâ spiêi di cheste sorte?». E a jerin dividûts fra di lôr. Alore a tornin a dîi al vuarp: «E tu, ce disistu di lui, pal fat che ti à vierzût i vòi?». Ur rispuindè: «Al è un profete».

I rispuinderin: «Tu sêts nassût dut intîr tai pecjâts e tu pratindis di insegnâns a nô?». E lu pararin fûr.

Gjesù al sintì che lu vevin parât fûr e, incuinrantlu, i disè: «Crodistu tu tal Fi dal om?». I rispuindè: «Ma cui esal, Signôr, par ch'o crodi in lui?». I disè Gjesù: «Tu lu âs za viodût: al è chel ch' al fevele cun te». Al disè: «O crôt, Signôr», e si butà in zenoglon denant di lui.

Peraule dal Signôr.

V DOMENIE DI CORESIME

PRIME LETURE

Us darai il gno spirt e o vivarêts.

Dal libri dal profete Ezechiel

37,12-14

Il Signôr, gno Diu, al dîs cussì: Ve jo o spalancarai i vuestris sepulcris, us fasarai saltâ fûr dai vuestris tombâi, vualtris popul gno, e us menarai te tiere di Israel.

O ricognossarêts che jo o soi il Signôr cuant che o spalancarai i vuestris sepulcris e us fasarai saltâ fûr dai vuestris tombâi, vualtris popul gno.

Us darai il gno spirt e o vivarêts; us fasarai vivi sigûrs te vuestre tiere e o ricognossarêts che jo, il Signôr, o ai fevelât e cussì o fasarai.

Peraule di Diu.

SALM RESPONSORIÂL

Dal Salm 129

R. Il Signôr al à boncûr e al perdone.

Signôr, ti berli dal font che mi cjati:
Signôr, scolte la mêm vôs;
ch'a sedin atentis lis tôs orelis
a la vôs de mêm preiere. R.

Se tu tegnis cont, Signôr, de tristerie,
Signôr, cui rivaraial a parâsi?
Ma li di te si cjate misericordie
par che ti rispietîn di plui. R.

O sperî, Signôr,
e spere la mêm anime;
o spieti la sô peraule.
La mêm anime e spiete il Signôr
plui che no lis vuaitis il cricâ de buinore. R.

Israel, spiete il Signôr,
parcè che cul Signôr si cjate il boncûr
e grande e je cun lui la redenzie.
Lui al sfrancjarà Israel
di dute la sô tristerie. R.

SECONDE LETURE

Il Spirt di chel ch'al à resussitât Gjesù dai muarts al è a stâ in vualtris.

De letare di san Pauli apuestul ai Romans

8,8-11

Fradis, chei che a son te cjar no puedin plasêi a Diu.

Vualtris però no sêts sot de paronance de cjar ma dal Spirt, dal moment che il Spirt di Diu al è a stâ in vualtris. Se un nol à il Spirt di Crist, nol è dai siei. Ma se Crist al è in vualtris, il cuarp al è muart par colpe dal pecjât, ma il Spirt al è vite par vie de justificazion. Alore se il Spirt di chel che al à resussitât Gjesù dai muarts al è a stâ in vualtris, chel ch'al à resussitât Gjesù Crist de muart ur darà la vite ancje ai vuestris cuarps distinâts a la muart e lu fasarà in fuarce dal Spirt ch'al è a stâ in vualtris.

Peraule di Diu.

CJANT AL VANZELI

Cfr. Zn 11,25.26

R. Laut e onôr a ti, Signôr Gjesù!

Jo o soi la resurezion e la vite, al dîs il Signôr,
chel ch'al crôt in me nol murarà par mai.

R. Laut e onôr a ti, Signôr Gjesù!

VANZELI ★

Jo o soi la resurezion e la vite.

Dal vanzeli seont Zuan

11,1-45

In chê volte, al jere un malât, Lazar di Betanie, il païs di Marie e di sô sûr Marte. Marie e jere chê che e veve onzût il Signôr cuntun profum e i veve suiâts i pîts cui cjavêi; al jere so fradi Lazar ch'al jere malât. Lis dôs sûrs alore a mandarin a dîi: «Viôt, Signôr, che chel che tu i vuelis tant ben al è malât».

Sintude cheste, Gjesù al disè: «Cheste malatie no je pe muart ma pe glorie di Diu, par che midiant di jê al sedi glorificât il Fi di Diu». Gjesù i voleve ben a Marte e a sô sûr Marie e a Lazar. Cuant che al sintì ch' al jere malât, al restâ altris doi dîs tal lûc là ch' al jere. Dome dopo ur dîs ai dissepui: «Tornìn in Gjudee». I disin i dissepui: «Rabì, i gjudeos a cirivin modant di clapadâti e tu tu tornis li?». Ur rispuindè Gjesù: «No sono dodis lis oris dal dì? Se un al cjamine di dì, no s'inçopede, parcè che al viôt la lûs di chest mont. Ma s' al cjamine di gnot, s'inçopede, parcè che al è cence lûs». Al à fevelât cussì e po ur dîs: «Il nestri amì Lazar si è indurmidît, ma o voi a sveâlu». I diserin alore i dissepui: «Signôr, se si è indurmidît, si salvarà». Gjesù però al fevelave de muart di lui. Lôr invezit a vevin scrupulât ch' al fevelâs dal indurmidi si de sium. Alore Gjesù ur disè franc: «Lazar al è muart, e o gjolt par vualtris di no jessi stât li, par ch' o crodês. Ma anin di lui!». Alore Tomâs, che lu clamavin Zimul, ur disè ai siei compagns: «Anin ancje nô a murî cun lui!».

Cuant che Gjesù al rivâ, lu cjatà ch' al jere za di cuatri dîs te tombe. Betanie e je lontane di Gjerusalem su lis dôs miis. Une vore di gjudeos a jerin vignûts di Marte e di Marie par confuartâlis dal fradi. Marte, a pene che e sintì ch' al rivave Gjesù, i lè incuintri. Marie invezit e jere sentade in cjase. Alore Marte i disè a Gjesù: «Signôr, se tu fossis stât culì, gno fradi nol sarès muart. Ma o sai che ancje cumò dut ce che tu i domandis a Diu, Diu tal darà». I dîs Gjesù: «To fradi al resurissarà». I dîs Marte: «O sai ch' al resurissarà te resurezion de ultime dì». I disè Gjesù: «Jo o soi la resurezion e la vite. Chel ch' al crôt in me, ancje s' al ves di murî, al vivarà; e ducj chei ch' a vivin e a crodin in me no muraran par mai. Crodistu chest?». I dîs: «Sì, Signôr. Jo o ai crodût che tu tu sêis il Crist, il Fi di Diu, chel ch' al à di vignî tal mont».

Dopo dit cussì, e lè a clamâ sô sûr Marie e i disè sotvôs: «Il mestri al è culì e ti clame». Jê, a pene sintude la gnove, e jevâ sù di corse par lâ li di lui. Gjesù nol jere ancjemò rivât tal paîs, ma al jere ancjemò tal puest là che i jere lade incuintri Marte. Cuant che i gjudeos ch' a jerin cun jê in cjase e le confuartavin, le vioderin a jevâ sù di dute corse e a jessî, i lerin daûr, scrupulant ch' e les a vaî li de tombe. Cuant che duncje Marie e rivâ tal puest là ch' al jere Gjesù e lu viodè, si butâ denant dai siei pîts e i disè: «Signôr, se tu fossis stât culì, gno fradi nol sarès muart». Alore Gjesù, viodintle a vaî jê e ancje i gjudeos ch' a jerin vignûts cun jê, si conturbâ dentrivie, si ingropâ e ur disè: «Dulà lu vêso metût?». I disin: «Signôr, ven e viôt». Gjesù al tacâ a vaî. A disevin alore i gjudeos: «Viôt trop ben che i voleve!». Ma un pôcs di lôr a diserin: «Chel li, che i à vierzûts i vôi al vuarp, no podevial ancje fâ in mût che chel chi nol murîs?».

Gjesù, un' altre volte dut spasimât, al va li dal sepulcri. Al jere un landri e denant a vevin metude une grande piere. Al dîs Gjesù: «Tirait vie la piere». I dîs Marte, la sûr dal muart: «Signôr, al puce za, ch' al è di cuatri dîs». I dîs Gjesù: «No ti aio dit che, se tu crodis, tu viodarâs la glorie di Diu?». Cussì a tirarin vie la piere. E Gjesù al alçà i vôi e al disè: «Pari, ti ai agrât di vêmi scoltât. O savevi ben che tu tu mi scoltis simpri, ma lu ai dit pe int ch' e je chi ator, par ch' a crodin che tu mi âs mandât tu». Dopo dit cussì, al berlâ a dute vôs: «Lazar, salte fûr!». Il muart al jessî fûr, leât pîts e mans cun fassis e la sô muse e jere invuluçade cuntun sudari. Gjesù ur dîs: «Disleaitlu e lassaitlu lâ».

Une vore di gjudeos, ch' a jerin lâts di Marie e a vevin viodût ce ch' al veve fat, a croderin in lui.

Peraule dal Signôr.

Forme curte:

Dal vanzeli seont Zuan

11,3-7.17-27.33-45

In chê volte, lis dôs sûrs di Lazar a mandarin a dîi a Gjesù: «Viôt, Signôr, che chel che tu i vuelis tant ben al è malât».

Sintude cheste, Gjesù al disè: «Cheste malatie no je pe muart ma pe glorie di Diu, par che midiant di jê al sedi glorificât il Fi di Diu». Gjesù i voleve ben a Marte e a sô sûr Marie e a Lazar. Cuant che al sintì ch' al jere malât, al restâ altris doi dîs tal lûc là ch' al jere. Dome dopo ur dîs ai dissepui: «Tornìn in Gjudee».

Cuant che Gjesù al rivâ, lu cjatà ch' al jere za di cuatri dîs te tombe. Betanie e je lontane di Gjerusalem su lis dôs miis. Une vore di gjudeos a jerin vignûts di Marte e di Marie par confuartâlis dal fradi. Marte, a pene che e sintì ch' al rivave Gjesù, i lè incuintri. Marie invezit e jere sentade in cjase. Alore Marte i disè a Gjesù: «Signôr, se tu fossis stât culì, gno fradi nol sarès muart. Ma o sai che ancje cumò dut ce che tu i domandis a Diu, Diu tal darà». I dîs Gjesù: «To fradi al resurissarà». I dîs Marte: «O sai ch' al resurissarà

te resurezion de ultime dì». I disè Gjesù: «Jo o soi la resurezion e la vite. Chel ch’al crôt in me, ancje s’al ves di murî, al vivarà; e ducj chei ch’á vivin e a crodin in me no muraran par mai. Crodistu chest?». I dîs: «Sì, Signôr. Jo o ai crodût che tu tu sêts il Crist, il Fi di Diu, chel ch’al à di vignâ tal mont».

Alore Gjesù, si conturbà dentrivie, si ingropà e ur disè: «Dulà lu vêso metût?». I disin: «Signôr, ven e viôt». Gjesù al tacà a vaî. A disevin alore i gjudeos: «Viôt trop ben che i voleve!». Ma un pôcs di lôr a diserin: «Chel li, che i à vierzûts i vòi al vuarp, no podevial ancje fâ in mût che chel chi nol murîs?».

Gjesù, un’altra volte dut spasimât, al va li dal sepulcri. Al jere un landri e denant a vevin metude une grande piere. Al dîs Gjesù: «Tirait vie la piere». I dîs Marte, la sûr dal muart: «Signôr, al puce za, ch’al è di cuatri dîs». I dîs Gjesù: «No ti aio dit che, se tu crodis, tu viodarâs la glorie di Diu?». Cussì a tirarin vie la piere. E Gjesù al alçà i vòi e al disè: «Pari, ti ai agrât di vêmi scoltât. O savevi ben che tu tu mi scoltis simpri, ma lu ai dit pe int ch’e je chi ator, par ch’á crodin che tu mi âs mandât tu». Dopo dit cussì, al berlà a dute vòs: «Lazar, salte fûr!». Il muart al jessì fûr, leât pîts e mans cun fassis e la sô muse e jere invuluçade cuntun sudari. Gjesù ur dîs: «Disleaitlu e lassaitlu lâ».

Une vore di gjudeos, ch’á jerin lâts di Marie e a vevin viodût ce ch’al veve fat, a croderin in lui.

Peraule dal Signôr.